

التحدي

التحدي

مسرحية

عماد أحمد الرمادي

الإسكندرية : حسناء للنشر

الطبعة الأولى : ٢٠١٧

ISBN 978 -977-6535-74-9

رقم الإيداع : ٢٠٠٠٩ / ٢٠١٧

ديوى : ٨١٣

١٤٠ ص ، ٢٠ سم

{ جميع الحقوق محفوظة © }



الإسكندرية ، ج . م . ع

٠١٠١٨٨٣١٣٦١

٠٣/ ٥٧٦٥٧٧٧

المدير العام : غادِلْ أبُو الأنوار

المراجعة اللغوية : غادِلْ أبُو الأنوار

الإخراج الفنى : أمير مصطفي

التحدي

مسرحية

عماد أحمد الرمادي



oboiikan.com

إهداء

إلى

زوجتي..

وأبنائي الاعزاء:

نوران؛ محمد؛ رنا؛ عمرو؛ سارة

أهديكم كلّ ما في قلبي من محبة،

وأرجو أن تسعدوا بهذا العمل.

مقدمة

متى يحين لهذه الأمواج الحائرة أن تصل إلى شاطئ
النجاة قبل أن تندثر في قاع المحيط، وتذوب فيها
كل المعاني والقيم الجميلة؛ لتسطع فوق الماء مره ثانية
كبقايا من الزمن الجميل.. نحن وهؤلاء والغير، وكل
من تملكه حامية العدول عن الفكر الباهظ يجب علينا
أن نبحث في أرشيف العقل عن فكرٍ جديدٍ؛ ينير
مصابيح عقولنا بمفاهيم وقيم رفيعة موردها المنطق
والحكمة والعدل في ظل وجود الحرية.

المؤلف

عماد أحمد الرمادي

٢٢/١/٢٠٠٤م

شخصيات المسرحية

" أسرة عصام "

عصام

عبد الحميد والد عصام
زينب والدة عصام

" أصدقاء عصام "

نبيل صديق عصام
حمدي صديق عصام
سمعه صبي المقهى

" أسرة النصبه "

الشيخ ورداني دجال
ياسين و خميس وكلاهما يعملان مع ورداني
وأربع رجال من عامة الناس

" أسرة الحاج عبد الغني "

الحاج عبد الغني صاحب الدكان
سندس زوجة عبد الغني
عم صابر عامل في الدكان

" أفراد مساعدة في العمل "

ضابط شرطة

الفصل الأول

المشهد الأول - يفتح الستار

**** (داخل منزل عصام) ****

**(عصام متأهب للخروج يقف في مواجهة الجمهور
ويحدث نفسه)**

**عصام : يا ترى إيه آخره الوسوس اللي بتطاردني كل
يوم دي ... ففي البيت والقهوة وارجع آخر
النهار أبويا يسمعني كلمتين في العضل ملهمش
لازمة.... وأمي تتدخل عشان تدافع عني و
كأنني عامل عملة... حتى أصحابي جبال
مش عوزين يخذوا خطوة واحدة لقدام.... ولا
مديني فرصة أخدها... حياتي بقت مملة وسخيفة
مفهاش حيوية ولا تغير.... حاسس أن أنا في
مشكلة كبيره ومش لاقى لها حل**

عصام : يا عم روح فجل إيه وبتاع إيه ... هو أنا
متخرج من جامعة الخضار... (إفاقة... ثم يدور
عدة خطوات علي المسرح) ... أنت مين؟ ...
مين بيكلمني؟ ... يا ترى في حد بيكلمني ولا
أنا اللي بكلم نفسي ولا بيتهيللي؟.. أنا أحسن حاجة
أروح أقعد مع أصحابي علي القهوة أحسن بالشكل
ده هتجنني ... دا إذ كنت معملتهاش ... والله أعلم.

**** (الأم تخرج فجأة إلى المسرح) ****

زينب : إيه يا عصام ... إيه يا حبيبي أنت بتكلم نفسك
ولا إيه ...

عصام : (ينتبه) ! لا يا ماما متشغليش بالك ..

زينب : يا ابني أنا سمعك بتكلم نفسك .

عصام : يا ماما أنا كنت بعكرش الناموس .. حتى
شوفي هُش هُش ...

زينب : ... (تنظر باستغراب) ... عجائب .

عصام : هه أنا خارج.. هتعوذي حاجه أجهالك من بره
يا ست الكل .

زينب : سلامتك يا ابني ..

عصام : ... (وهو خارج) ... يله سلام ..

زينب : سلام سلام عليه العوض ومنه العوض الواد
الحيلة اللي طلعا بيه من الدنيا باين له لسع
.. ربنا يشفي كله منك يا عبد الحميد ... ربنا
يسامحك كل ما أقوله بالراحة ع الواد شويه
.. متزهقوش أكثر ما هو زهقان ميسمعشي
الكلام .. لحد ما الواد يا ضنايا ما لسع .. إيه
يعني الواد لسه مشتغلش ما هو كل الشباب
اللي من سنه ببيقوا كده في الأول وبعد كده
بينصلح حالهم وبيقوا زيّ الفل، ربنا يهديك يا عبد
الحميد يا جـوزي أنت وابنك و ينورلكم
طريقكم ع الصبح .

** (ثم تخرج من المسرح، وبعد لحظات يظهر علي
المسرح الأب عبد الحميد - وهو رجل كبير في
السن - متأهبا للخروج) **

عبد الحميد : يا زينب يا زينب

زينب : أيوه يا أخويا ... أيوه يا عبد الحميد ... صباح الخير .

عبد الحميد : صباح الخير يا زينب أmaal البيه ابنك ..
صحى من النوم ولا لسه..

زينب : لأ ... آه.. صحى وخرج من بدري ..

عبد الحميد : هو إيه اللي لأ وإيه اللي آه ؟... مالك يا زينب؟!

زينب: مفيش يا خويا مفيش.

عبد الحميد : هو إيه اللي مفيش يبقى خرج كالعادة
يروح القهوة يقعد فيها مع أصحاب السوء ويرجع
آخر الليل ...

زينب : يا أخويا ما تمسكش أهين الواد ... دا برضو
لسه شاب ...

عبد الحميد : يعني مفيشش مصلحته يا زينب...
ويدورله علي شغلانه بدل قعدة القهوة

زينب : ومين اللي قالك إنه يا حبة عيني ما
بيدورس علي شغل ... ما هو بيطلع مع أصحابه
يدوروا علي شغل ويرجعوا آخر النهار يقعدوا
على القهوة شويه... مفيهاش حاجه دي ... ولا
أنت عايز تعمل من الحبة قبة !.

عبد الحميد : لا حبة ولا قبة... هو أنا بحرق في دمي
معاه ليه.. مش عشان يبقى راجل يعتمد عليه
ويشق طريقه ... الحياة بقت صعبه يا زينب
والدنيا غلا والظروف مبترحمش حد ...
والزمن ده اللي معاه فيه قرش يساوي قرش
واللي معهوش ما يساويش هو إحنا عندنا مية
عيل دأهو عيل واحد اللي طلعا بيه من الدنيا
عشان كده عاوزه أحسن الناس كلها

زينب : ... (مقاطعة) ... أدبك قولتها الواد الحيلة اللي
طلعا بيه من الدنيا ... عشان كده عايزاك تاخذ
وتدّي معاه بالراحة... وترسيه على مصلحته
بالعقل مش بالعصبية ... دا مهما كان برضو
شاب ... والشباب كلهم بيبقوا كده في الأول
وبعدين بيعقلوا ... وعلى رأي المثل إن كبر
ابنك خاويه ... اسكت يا عبد الحميد يا خويا ...
الواد باين له لسع ...

عبد الحميد : لسع إزاي يا زينب ...

زينب : ... (ثم تقترب منه ... وبصوت خافت) ...
سمعتة يا خويا وأنا في المطبخ وهو بيكلم نفسه
... طلعت عليه من المطبخ ... و قولت له هو
أنت بتكلم مين يا ابني ... قاللي ما فيش حاجه
يا ماما دا أنا بكرش الناموس .. (في لهجة تقليد)
... هش .. هش .

عبد الحميد : ... تصدقي بالله يا زينب ...

زينب : لا إله إلا الله يا أخويا .

عبد الحميد : باين لك إنتي اللي دماغك لسعة مش هو ... تصبحي علي خير يا زينب يا دوب الحق الشغل دا إذا لحقت ... (ثم يخرج من المسرح)

زينب : ... (تقترب من الجمهور) ... أصبح علي خير ... أصبح علي خير إزاي وإحنا لسه في أول النهار عليه العوض ومنه العوض الراجل راخر باين له لسع ربنا يشفيه أما أروح أكمل شغلي في المطبخ أحسن ألسع أنا كمان.

**** (تخرج من المسرح وتُخَفَّف الإضاءة)****

**** (ثم يُغلق ستار) ****

المشهد الثاني

**** (يُفتح الستار على مقهى شعبي.. حمدي ونبيل
يجلسان على طاولتهما المميزة، يلعبان
"الدمنة" في حالة اندماج شديد) ****

**عصام : ... (يقترّب منهما) ... سلاموا عليكم (ثم
يجلس بجوار حمدي) ...**

**حمدي ونبيل: (في نبرة واحدة) ... وعليكم السلام
ورحمة الله وبركاته...**

حمدي: أهلا أبو السباع ...

عصام :؟

نبيل: ... شكلك مش حلو النهارده يا صاحبي ...

**عصام: النهارده بس.....و امبارح وبكره وبعده
وقبله...**

حمدي: بس...بس...بس...اقفل علي الدمنه.

نبيل: اقفل..... (وهو يللم في زهرة الدمنة/النرد)....

حمدي: الواد ده شكله يائس ... (ثم ينظر في عينيه)

... لا حول ولا قوة إلا بالله أنا فاكـر إن

الحالة دى كانت بتجيله ساعات... أيام

الجامعة فاكـر يا نبيل...

نبيل : ... (ينظر هو الآخر إلى عصام) ... آه فاكـر

.... بس اللي عنده دلوقتي إحباط ...مش يأس...

عصام:.....؟

حمدي : تمشى إحباط اللي أنت بتقول عليه ده .

نبيل: تمشى بس بالغاز الطبيعي مش البنزين .

**** (يضحكان معًا بصوتٍ عالٍ)****

عصام : بلاش تستظرف أنت وهو أنا مش ناقصك ع
الصبح .

حمدي : روّق كده يا أبو السباعمش كده يا أخى

نبيل: شف له حاجة في أجزخانة سمعهتروق
مزاجه .

حمدي: وله يا سمعه .

سمعه: ... (القهوجي) ... أوامر البهوات .

حمدي: هات هنا واحد شاي ... للأستاذ عصام شاي وصاية آه .

سمعه: علم وجارى التنفيذ ... (ثم ينصرف) ...

حمدي: مش عارف ليه الواد ده محسنى أنه شغال في غرفة عمليات المباحث ...؟!

نبيل: تف من بقبك الشر بره وبعيد مش كفاية إلا إحنا فيه

عصام: بقولك إيه أنت وهو ... انتوا باين عليكم جبلات وفيقين ورايقين ومزاجكم آخر نضافة ... أنا زهقان و طهقان ومزاجي عفش ... اشفكو مرة ثانية لما أفوق

حمدي: استتنا ... استتنا يا راجل ... استهدى بالله كده واقعد دلوقتي "سمعه" يجبلك شوية شاي تنفض بيهم العفاشه اللي في دماغك..

نبيل: إيه الحكايه يا عصام..... حد اتكلم معاك في البيت ولا حاجة.....

عصام: لا حد ولا سبت

حمدي : او مال ايه يا صاحبيمالك مش هضمنا
ولا هاضم نفسك ليه كده ما أنت كنت
امبارح زيّ الفلفي ايه...

عصام: زهقت من الفراغ عايز أغير ... أعمل حاجة
... أشتغل حاجة مليت.

حمدي : ما هو علي يدك يا صاحبي .. هو إحنا لقينا
شغل واتبطرنا عليه.. من يوم ما خلصنا
الجامعة وإحنا بندور علي شغل وما باليد حيلة .

عصام : أيوه بس لازم نجد شوية نتحرك أحسن كده
بقي شكلنا وحش أبويا زهق مني وبقي حاسس
إن الكلام معدش جايب معايا نتيجة؛ لدرجة انه
معدش عايز يبص في وشي وأنا كمان بقيت
خايف من مواجهته لولا أُمي بتهدية شوية
وتطمنه شوية الله اعلم كنا وصلنا لفين لكن في
النهاية كل ده مش حل .

نبيل : ... (مُتهجماً) ... انتوا اللي عملتم في نفسكم
كده قولت لكم نشغل أي شغلانة والسلام عبال
ما تفرج معجبكوش عايزين شغل مخصوص
بمرتب مخصوص اشربوا بقي .

عصام : الموضوع مش أننا عايزين شغل مخصوص
بمرتب مخصوص إحنا عايزين شغلانة نلاقى
فيها نفسنا ... شغلانة مناسبة يا آخى.

نبيل : قصدك شغلانة متفصلة علي مقاسك صعب يا صاحبي ... لو كل واحد بيختار الشغلانة اللي على كيفه مكنش حد غلب .

حمدي : إيه يا عم نبيل .. الراجل مش قصده كده يا أخي.

نبيل : أمال قصده إيه يا حمدي؟ .

حمدي : قصده شغلانة محترمة يا أخي في القطاع الخاص مثلا كده بدل ما الواحد ما يشتغل في الفاعل أو يبيع جرجير ولا صبي قهوة زيّ سمعه .

نبيل: ومالها شغلانة الفاعل أو بيع الجرجير أو حتي صبي القهوة كلها مهن محترمة، واللي شغال فيها فاتح منها بيت وعایش مستور ولا إيه يا عم عصام .

عصام : كلامك باين له صح يا نبيل .

نبيل : وليه متقولش أكيد

عصام : علي الأقل أحسن مية مرة من اللي أحنا فيه لغاية ما ربنا يفرجها .

حمدي : بس ما كنش دا كلامك قبل كده يا عم نبيل .

نبيل : عندك حل ثاني .

حمدي : الأمر لله ... اللي تشوفوه ...

سمعه : ... (يدخل الشاي) ... شاي الأستاذ عصام .

نبيل : هات معاك واحد قهوة مضبوط و حياة أبوك يا
سمعه علي حساب الأستاذ حمدي بعد قلبة
الدماغ دي .

حمدي : أيوه يا حبيبي مانتتش غرمان حاجة بس و
حياتك بعد كده لا أخليها انجليزي وشد حزامك يا
جعان

عصام : ... (يضحك) ... مش قوى كده يا حمدي
طريها شوية لغاية ما تفرج.

نبيل : طب خد دي الفلوس مع التيوس

عصام : أكيد حمدي هيقوم معاك بدور واجب

نبيل : وأنت الصادق هيقوم معاك بدور سعد اليتيم في
الوهم

عصام : ... (يضحك) ...

حمدي : أما أنا أقوم بدور سعد اليتيم في الوهم أنت
تقدم نبيل الخروف في الجهل ... (الكل يضحك
بصوت عالٍ) ...

نبيل : مقبولة منك علي قد سنك ...

عصام : خاينا بقى في المهم ... هنفذ اللي قلناه ده إمتي وازاي.

نبيل : أنا شايف نبدأ من دلوقتي وجايز ربنا يكرمنا بشغل يليق بمقامكم الرفيع.. بدل الفاعل وصبي القهوة..

حمدي : أنا لي واحد صاحبي شغال في شركة سياحة إيه رأيكم نطب عليه دلوقتي..

عصام : حلو.. جميل محلاه شغل السياحة أمال كان فین صاحبك ده من زمان .

حمدي : كنت مدكنة للطوارئ واهو جه وقته .

نبيل : ومستنتي إيه يله بينا.. (حمدي يضع ثمن المشروبات علي الطاولة ثم يخرجون من المسرح) ...

سمعه : القهوة يا بهوات.. (ثم يأخذ ثمن المشروبات من فوق الطاولة) ... مش عايزين تشربوها... نشربها إحنا ما يضرش (يأخذ رشفة)..

*** (ثم يُغلق الستار) ***

المشهد الثالث

* المكان : دكان عطارة عبد الغنى سعيد .

* الزمان : التاسعة صباحًا .

**** (يُفْتَح الستار... المسرح خالٍ من الأصوات.. في هذه اللحظات يدخل عم صابر) ****

عم صابر : يا فتاح يا عليم.. يا رزاق.. يا كريم... (ثم يفتح دكان العطارة ويجلس أمامه يتصفح دفتر البضاعة).. منك لله يا سندس مخلتيش في الدكان بضاعة ولا فلوس أهو كله على قفى جوزها...الراجل المسكين الحاج عبد الغنى...كان الله في عونہ سلم لها نفسه على الريق ... وأهي عمالة تنتش من المخزن حبة ومن الدكان حبة.. وتوزع علي أخواتها العواطلية وخصوصًا الدجال اللي ضاحك عليهم بالأحجية وأعمال السحر... والراجل يا ولداه مش دريان بحاجة ما هم ملجمينه بالسحر ... مش عارف اعمل إيه.. أقوله

الحقيقة... (مخاطبًا نفسه متّجهاً نحو
الجمهور)... ممكن يكون عارف ... ولو
مش عارف ممكن ميصدقش وحتى لو صدق
ممكن تأثر عليه وينقلب ضدي وتطير مني
الشغلانة اللي بأكل عيالي منها عيش ...
ما هي بتسحر له.. وأخوها إبليس أنا
أحسن حاجة اخلينى في حالي.. وأسيبها على
الله.

**** (في هذه الأثناء يدخل الحاج عبد الغنى) ****

عبد الغنى : إيه يا عم صابر بتكلم نفسك ...
عم صابر: (يفيق فجأة) لا لا ولا حاجة
عم صابر : اتفضل يا حاج (ثم يجّهز له مقعدًا
بجانبه) ...
عبد الغنى : صباح الخير ... (ثم يجلس بجواره) ...
عم صابر : صباح الخير يا حاج .
عبد الغنى : إيه أخبار الشغل اليومين دول؟.

عم صابر : نعمة من الله.. بس الشغل نايم اليومين دول
شوية.

عبد الغنى : ما أنت عارف إن الشغل له مواسم
...فرجه قريب .

عم صابر : بس مش بالشكل ده... وبعدين فى عجز فى
البضاعة اللي جات الآخر.

عبد الغنى : زيّ إيه يا عم صابر

عم صابر : ... (بغيظ شديد) ... زيّ الحبوب
والزيوت والبخور ... (ثم يقترب من الجمهور)
... ويا رب الحق يفهم.

عبد الغنى : طب ما تجرد المخزن وتراجع دفاترك..
جايز يكون فى غلط فى الحسابات ولا حاجة.

عم صابر : الست سندس منبهة عليّ ... لا أحسب ولا
أجرد...

عبد الغنى : يا سيدي قصدها تساعدك يا عم
صابر...أنت برضو تعبت معانا كتير.. ولا أنت
نسيت دا إحنا شغلين بقلنا ثلاثين سنة يا راجل
... كتر خير الدنيا .

عم صابر : ... (فى جنب من المسرح) ... الحق
باين له طلع مبيفهمش... (ثم يعود للحوار

مرة ثانية) ... قصدك إن إحنا عجزنا
ومعدناش نفع يا حاج عبد الغنى .

عبد الغنى : مش بالظبط ... و من ناحية أنا عجزنا
فإحنا فعلا عجزنا مش هي دى الحقيقة .

عم صابر : ... (صامتًا) ...؟

عبد الغنى : و بعدين متزعلش من سندس ... أنت
عارف طبع الشباب ... بيحبوا يتحكموا في كل
حاجة.. وخصوصًا الستات.. وبالأخص
سندس بتحب تحشر دماغها في كل حاجة كبيرة
وصغيرة ... وفي النهاية إحنا فينا البركة طبعًا...

عم صابر : ... (بسخرية) ... طبعًا ... طبعًا ...
(بصوت خافت) ... الحق اتعمله حجاب
بعدم الفهم ... (ثم يعود للحوار).. أنت
بترضيني ولا بتراضى نفسك يا حاج وعلي
حساب مين.

عبد الغنى : متتحسبش كده يا رجل يا طيب.

عم صابر : آمال تتحسب إزاي يا حاج؟...

عبد الغنى : أنت عارف إن أنا شقيت في حياتي كثير
وتعبت كثير وفي النهاية اتجوزت علي كبر
وسندس ضحت عشاني مرتين ... مرة لما

قبلت تتجوز راجل في سن أبوها وهي في عز
شبابها والثانية لما عرفت إني مبخلفش ومع ذلك
قبلت أنها تعيش معايا رغم إنها عاشت بداية
حياتها في يتم وفقر وحرمان فكان من باب
أولى إنها تتجوز شاب زيتها وكمان تنجب
منه.. مش تتجوز راجل في سن أبوها
وكمان تتحرم من الإنجاب وتعوض
مأساتها بمأساة عشان كده مبحولش أزعلها، ومن
ناحية الشغل أهي تتسلى بدل ما تقعد لوحدها في
البيت.

عم صابر : ... (يتقدم نحو الجمهور مخاطبًا نفسه)
... أيوا باين الست لسعت عقلك يا حاج ...
دي جنية بنت جنية... عمرها ما تضحى
ببلاش أبدًا... صحيح إن كيدهن عظيم ... (ثم
يعود للحوار مرة ثانية) ... أيوه بس أنت
لازم تتابع يا حاج ... بردو زى زمان دا
مهما كان تعبك وشقاك و ميهنوش عليك
بالساهر...

عبد الغنى : ما أنت عارف إن أنا بسافر أجيب بضاعة
وعندي التزامات تانية وقله متابعتي إني مطمئن
ع الشغل معاك ... وسندس أهي بتساعد
ومفيش حد غريب أقلق منه ...

عم صابر : والله اللى تشوفه يا حاج ...

عبد الغنى : أنا عارف إن قلبك على الشغل يا عم صابر وانك تعبت ومحتاج حد يساعدك .

عم صابر : من ناحية إننا محتاجين.. فأحنا فعلا محتاجين ... بس مش أي حد..

عبد الغنى : كلامك صحيح يا عم صابر إذا كان على اللي بيشتغلوا فهما كتير.. بس المهم الثقة والأمانة... و خصوصاً إن الفترة اللي جاية هنجيب بضاعة كتير ... والشغل هيبقى مضغوط ... عمتا أنا هسيبك... دلوقتي علشان عندي ميعاد بعد ساعة.. وهبقى أعدي عليك بكره ... إن شاء الله ... علشان أكمل كلامي معاك... لأنني حاسس إنك عايز تقول حاجة ومش عارف تبتديها إزاي.

عم صابر : لا حاجة ولا محتاجة ... كله على الله.

عبد الغنى : ونعم بالله... ماشى الحال يا عم صابر....السلام عليكم ... (ثم يخرج من المسرح)...

عم صابر : وعليكم السلام يا حاج ... (يتقدم نحو الجمهور) ... لا حول ولا قوه إلا بالله ... الراجل اتلجم وحاله اتشقلب من يوم ما اتجوز اللي متتسمى ... سندس أخت إبليس معدش ده الحاج عبد الغنى اللي أعرفه من ثلاثين

سنة... ده بقى الحاج مطيع ... الحاج
حاضر.. الحاج نعم.. شخشيخه و بما انه ملوش
وريث... لا من قريب ولا من بعيد يبق سندس
أولى بيه هي والدجال وبقية العصاة..
وعلى رأى المثل جحا أولى بلحم طوره،
صحيح رزق الهبل على المجانين..

**** (فجأة تدخل سندس إلى المسرح) ****

سندس : ... صباح الخير يا عم صابر
عم صابر : مين؟.. ست سندس.. صباح الخير
... صباح الفل ... اتفضلي..

**** (ثم يقرب لها المقعد) ****

سندس : ... (بصوت خافت غريب) ... خليك زيّ ما
أنت هات لي دفتر الحسابات .
عم صابر : حاضر ... (يعطيها الدفتر ثم يتقدم
نحو الجمهور) ... مش عايدتها ... ميعاها
دايمًا كل يوم آخر النهار.. يا ترى إيه اللي
حدفها النهارده بدري كده ... لا الموضوع فيه

إن صباحيته معكروة وبياضها مش ناصع
سترك يا رب .

سندس : لسه مبعتش حاجة النهارده يا عم صابر .

عم صابر : لا بعنا ولا اشترينا ... على الأبيض ... لسه
بنقول يا فتاح يا عليم .

سندس : يا عم صابر دا إحنا لدوقتي داخلين على
الساعة حداثر معقول مبعتش حنة بمائة
جنية.

عم صابر : ربك يرزق ... عنده كتير.

سندس : ... (تحدث نفسها في جانب من المسرح) ...
أهه هيدروش عليّ بقى ويعمل فيها عبده
العبيط ميعرفش إن إحنا اللي بندروش
على الناس ... (ثم تعود للحوار) ... لسه
عندك بخور في الدكان.

عم صابر : ما أنت خدتيه الأسبوع اللي فات كله...

سندس : أوعى تكون قيدته.

عم صابر : طبعًا.. قيدته... سامحيني يا بنتي دا شغل.

سندس : ... (بعصية) ... إزاي..

عم صابر : إللي بيدخل الدكان بقيده ... واللي بيطلع من الدكان بقيده... وده مش من النهارده ... دا من زمان وإحنا على كده .

سندس : ده كان زمان ... الوضع دلوقتي أتغير وأنا قلت لك الكلام ده قبل كده.. يعني أنا دلوقتي إللي ماسكة الشغل ... وأنا هنا الكل في الكل وكلمتي لازم تتسمع ... مفهوم يا عم صابر .

عم صابر : مفهوم يا بنتي ... (يحدث نفسه في جانب من المسرح) ... قال إيه اللي صبرك علي المرء؟!...

سندس : ... اسمي الست سندس!...

عم صابر : حاضر يا ست سندس ... بس الحاج لما كان هنا النهارده مجبش سيره يعني عن الكلام ده .

سندس : أديني بقولك أهه ... أنا المسئولة ... (ثم تنتبه) ... هو الحاج كان هنا النهارده .

عم صابر : أيوه

سندس : قال إيه؟ ... وأنت قولت له إيه؟.

عم صابر : كنت بقوله إن الشغل اليومين دول واقف وأن ... (ثم يقف ويخط بيده علي يده) ...

أفقل ... أفقل ... (بصوت خافت) ... بقى أنا
عايز أشتيتها ... وأنت عايز تريحتها .

سندس : وهو قال لك إيه؟

عم صابر : ما قالش حاجة .

سندس : ما قالش حاجة ... معقولة ... (بصوت
خافت) ... آه منك يا راجل يا كركوب ...
ساهي وداهي ... (ثم تعود) ... ماشي يا عم
صابر جهز نفسك للجرد الشهر قرب يخلص .

عم صابر : أنا جاهز من دلوقتي .

سندس : ... (بغیظ شديد) ... سلام ... (ثم تشير
ببيديها الاثنتين) ... آه آه .

**** (ثم تخرج من المسرح) ****

عم صابر : ... (بسخرية) ... سلام سلام يا خسارة
لو عندي قُلَّة دلوقتي ما كنتش استخسرتها
فيكي ربنا يخبلك كمان وكمان يا سندس يا
بنت عفر كوش ...

***** (ثم يُغلق الستار) *****

المشهد الرابع

* المكان : منزل عصام .

* الزمان : الثالثة مساءً .

**** (يُفْتَح الستار على والد عصام جالس يتصفح
الجرنال)****

عبد الحميد : خلّصتي الشاي ولا لسه يا زينب .

**زينب : ... (يظهر صوتها من خارج المسرح) ...
حالا يا عبد الحميد أنا جاية اهه يا اخويا ... (ثم
تدخل ومعها صينية الشاي) ...**

**عبد الحميد : آمال عصام ... هيقتضي اليوم كله بره ولا
إيه.**

**زينب : الغايب حاجته معاه ... تلاقيه مع حمدي
ونبيل بيدّوروا على شغل وتأخروا شوية.**

**عبد الحميد : حجة كل يوم ... اللي بتداري عليه
بيها ... والله ما حد خارب بيته إلا حمدي ونبيل
دول أصحاب السوء.**

زينب : يا عبد الحميد ما تقولش كده ... هو كان بإيديهم حاجة ومعملوهاش ... دول برضوا شباب لسه عودهم طري ... وقلالات الحيلة .

عبد الحميد : أيوه يا أختي أهو ده اللي أنتي شطره فيه طب أهو النهارده أجازته مش كان يخلي عنده شوية دم ويقعد مع أبوه في البيت في يوم زي ده .

زينب : يا أخويا ما هو أنت اللي مش عاطي له وش ومش طابق تبص في وشه.

عبد الحميد : ما هو من سرمحته ع القهاوي ورجوعه البيت بعد نص الليل يا زينب.

زينب : يا عبد الحميد مضيعش الواد من إيدك متخلكش عدو خليك حبيب الواد يا ضناية وشه راح زيّ اللمونة وقاطع المية والزاد وحاله ميسررش عدو ولا حبيب.

عبد الحميد : ما هو إنتي السبب يا زينب.. إنتي اللي مدلاعه وكل اما آجي أكلمة تقولي بالراحة على الواد يا سي عبد الحميد الواد لسه عضمه طري مسيره يعقل بكرة يشتغل ويبقى زينة الشباب أهو لحد دلوقتي مش قادر يا خد خطوة لقدام.

زينب : يوه متصلي ع النبي يا أخويا و متمسكش أهين
الواد خلي ربنا يصلح حاله.

عبد الحميد : أيوه أهو ده اللي باخده منك ساعة ما
تتزنقي تلجميني بالكلمتين دول.

زينب : برضو اللي في دماغك في دماغك يا عبد
الحميد ربنا يهديك .

**** (فجأة يطرق الباب) ****

عبد الحميد : ربنا يهديكي يا زينب ... افتحي الباب
... باين ابنك وصل بسلامته .

**** (ثم تفتح زينب الباب ويدخل عصام) ****

عصام : سلام عليكم!

عبد الحميد : وعليكم السلام مش عويدك ترجع بدري!

عصام : أصل يا بابا.....!!

عبد الحميد : ... (مقاطعًا) ... أصل إيه وقلة أصل
إيه ... حتى اليوم الأجازة مش عايز تقعد معايا
فيه...

عصام: ... ما هو!

زينب: ... (مقاطعة) ... ما هو بسلامته راجع
 بدري أهه ... عشان يقعد معاك.. هو ليه في
 الدنيا غيرك.. ربنا ميحرمكومش من بعض
 أبداً...تلاقيك يا ضنايا علي لحم بطنك من
 الصبح ... حالاً أجهّز لك الغدا ... (ثم تحدث
عبد الحميد في جانب من المسرح) ...
 بالراحة علي الواد.. يا عبد الحميد وبلاش
 لسعة الدماغ دي.. (ثم تخرج من المسرح) ...

عبد الحميد : والله أنتي اللي باين عليكي لسعتي يا
 زينب ... (ثم يقترب من عصام) ... شوف يا
 عصام يا ابني أنا تعبت في حياتي كتير ...
 عشان أوصل للي أنا وصلتله ... بفضل الله
 ... تفتكر اللي أنا بتعب فيه النهارده وبكره
 عشان مين ...

عصام : ... (ناظرًا إلى أبيه بلا حراك) ...؟؟

عبد الحميد : عشانك أنت ... عشان كده مصلحتك
 تهمني ... مش كده وبس ... أنا عايزك تكون
 أحسن واحد في العالم ... أحسن مني أنا ...
 لأنك بالنسبة لي حصاد العمر وأنا مش هقبل
 إن ابني الوحيد يضيع مني وأنا بتفرج عليه
 عشان كده عايزك تساعدني وتساعد نفسك
 لغاية ما تقف على رجلك فاهمني يا عصام .

عصام : فهمك يا بابا وأنا كمان أتمنى إن أكون زى ما أنت عايز .

عبد الحميد : غلط غلط يا عصام مش زى ما أنا عايز زىّ اللي فيه مصلحتك ومستقبلك، شوف يا ابني الحياة لذيذة برغم ما فيها من ألم وفرح ومصادفات ومشاحنات وظروف صعبة وسهلة؛ إلا أنها مشوار طويل ميمش هوش إلا اللي نفسه طويل، والنفس الطويل محتاج صبر وعزيمة و جهد.

عصام : ونجيب منين الصبر والعزيمة والجهد في ظل الظروف الصعبة اللي إحنا بنعيشها.

عبد الحميد : الأساس النية واللي معندوش النية هيفلّس قبل ما يبدأ المشوار بخطوات وفي الحالة دي هيبقى أشبه بميت يمشي علي قدم حيّ لا منه ساير حياة الأحياء ولا هو في تعداد الأموات؛ باختصار مش جيلكم بس اللي عانى في الحياة يمكن أنتو أحسن حظاً منّا.

عصام : ... تفكر يا بابا؟.

عبد الحميد : طبعاً إحنا عشنا حياة كلها حروب وانتكاسات وانكسارات، ومع ذلك ممتناش ولا سلمنا بالعكس كنا صامدين لآخر لحظة.

عصام : يجوز بالفرض إننا أحسن حظ منكم مع التقدم الهائل اللي إحنا بنعيشه، لكن برغم ذلك الفرص متاحة للبعض مش للكل بمعنى أدق لأصحاب الجاه والنفوذ والسلطان والوساطة أما الغلبة..

عبد الحميد : ... (مقاطعاً) ... أما الغلبة اللي زيكم في ريب مما يتواكلون مقارنة باطلة يا أستاذ.

عصام : بالعكس وليه متقولش إن غياب العدالة الاجتماعية هي لب القضية .

عبد الحميد : هنفترض إن كلامك صح لكن تفكر إن مجرد إن الفرصة أتاحت للغير وأنت والغلبة ماصبكمش الحظ يبقى ده دافع للتراخي ومسايرة عنادك وهو اجسك.

عصام : أنا مش متراخي ولا بعاند ... بس ...!!

عبد الحميد : ... (مقاطعاً) ... مفيش بس ...

عصام : لاني ... صدقتي يا بابا كل حاجة النهاردة محتاجة واسطة.. وظيفة الحكومة ... حتى الشغل في القطاع الخاص ... الكلام ذاته بقه بواسطة.

عبد الحميد : مش صح .. (بنرفزة) .. وحتى لو صح مش معناه إنك تيأس.

عصام : أنا معاك بس قولي إيه إلا ممكن اعمله اكثر من كده ... آخر مكان روحنا ندور فيه على شغل ... في شركة سياحية ... أول سؤال سألها المسئول أنتوا جايين من طرف مين؟.. معرفناش نجابوب ... وكمنا مقدرناش نقابل المدير ... واحنا خارجين ... واحد من الموظفين قال لنا لو عايزين تتعينوا هنا من الآخرشوفوا لكم واسطة.

عبد الحميد : أكيد في شغل كثير مش محتاج واسطة ... مش محتاج أكثر من إنك تسعى له ... حاول مره وانتين وتلاتة وعشرة ما فيش داعي لليأس ... الحياة النهاردة يا ابني أشبه بحرب في كل الاتجاهات من أجل إثبات شيء ونفي شيء آخر، أكون أو لا أكون، بإيدك تحرر نفسك من السراب اللي أنت عايش فيه، وبإيدك تسلم وتقف عند محلك سر وفي الحالتين الهدف واحد من اثنين إما الفشل أو النجاح.

عصام : ... وأنا قبلت التحدي ومن دلوقتي ...

عبد الحميد : ... عشان تثبت إيه ...

عصام : ... طبعا النجاح ...

عبد الحميد : ... عشان ترضيني ...

عصام : ... لا عشانى أنا ...

عبد الحميد : صح يا عصام أول كلمة تقولها صح ...
أنا كنت متأكد إنك فاهم وحتى لو مش فاهم
عندك استعداد تام إنك تفهم وأنا مش عايز
أكثر من كده.. ياه اهو أنا دلوقتي ارتحت..

عصام : وأنا كمان وخصوصاً بعد ما اتكلمت معاك.

عبد الحميد : ... (يحتضن ابنه) ... حاول تفكر مرة
ثانية من جديد وأنا في انتظار قرارك وفي
كل الأحوال هكون سعيد بيه... (ثم يحتضن
ابنه بحب شديد) ..

***** (ثم يُغلق الستار) *****

سمعه : ... سريع سريع ... هو إحنا نقدر نتأخر علي الأستاذ .

حمدي : ماشي يا عم القطر ... ما قولتليش ... بقالك كام يوم غايب عنا كده وهليت مره واحدة؟..

عصام : وحشتوني يا أخي وجاي أشوفكم ... فيها حاجة دي؟.

حمدي : لأ عندك أصل بس مش ده السبب أكيد في سبب تاني.

عصام : والله بعد مشواركم المهبب ده بتاع شركة السياحة رجعت البيت مهموم ومغموم ومليش نفس لا أكلم حد ولا أشوف حد دخلت البيت لاقيت أبويا قاعد زيّ ما يكون منتظرني.

حمدي : ... (مقاطعًا) ... حلو هنا بداية الحريقة.

عصام : ... (يضحك هو وحمدي) ... قصدك البداية اللي طفيت فيها الحريقة .

حمدي : اللي في البيت ... مش كده ..؟

عصام : لا يا خفيف ... اللي جوايا ...

حمدي : ولو اني مش فاهم حاجة ... بس مش مشكلة ... كمل ..

عصام : إتكلم معايا ... وأمي ادخلت وطرّرت القعدة بكلمتين كالعادة، حاولت اشرح له ظروفى وإن أنا مش مقصّر ... لكن الظروف هي اللي مش مساعدانى وحكيت له عن آخر مكان روحناه ندور فيه على شغل وطلبوا منّا واسطة.

حمدي : ... (مقاطعًا) ... أكيد قال لك محدش مخيبك إلا حمدي ونبييل .

عصام : الله.. هو أنت كنت معانا ...؟

حمدي : ... لاء ...!

عصام : أمال عرفت إزاي..

حمدي : بالحاسة السبعتاشر... (يضحك معًا) المهم وصلتوا لإيه.

عصام : قال لى أنتوا كسلّله و معندكوش صبر ولا عزيمة ولا جلد وفى النهاية وصلت لمرحلة التحدي لإثبات العكس بالنيابة عن أبناء جيلي.

حمدي : بطل يا أبو السبع من يومك ... بس أنا برضو زعلان منك ...

عصام : ... ليه ...؟

حمدي : بقى تغتابنا يا راجل أنت وأبوك في غيابنا..

عصام : الله.. هو أنت كنت معنا؟

حمدي : طبعًا بالحاسة السبعتاشر (وفي هذه الأثناء يدخل نبيل) ... آه مش قلت لك أهي جابت نبيل من علي بُعد...

نبيل : ... (يسلم عليهم) ... (موجهًا لعصام) ... إيه اللي بيقول عليها دي ...

عصام : ده الحاسة السبعتاشر ... سمعت عنها قبل كده؟..

نبيل : آه بس نزل دلوقتي الأحداث منها ... الخمسة وتسعين والستة وتسعين... شغلت واحدة قبل ما آجي وعرفت إنكم شربتوا شاي من غيري يا خونة...

حمدي : اتفضل يا سيدي ... اهو ده الجيل اللي أنت بتتحدى أبوك بالنيابة عنه.. شوف بيفكر في إيه.. تصدّق بالله إحنا فعلاً جيل فاشل وأبوك عنده حق.. واحد شاي عكنة وحياة أبوك يا سمعه.

نبيل : لا أنا هقوم امشي بقى.. (حالة مزاح) ...

عصام : اقعد بس يا نبيل..

نبيل : مش سامعُه بيقول إيه.. إحنا فاشلة.. وعائز
كمان يجيب لي شاي عكنه..

حمدي : مش أنا اللي بأتهمكم ... دا عمك ... أبو عصام

نبيل : وعصام سكت له.. (حمدي وعصام يضحكان)!

حمدي : لا طبعًا ... قال له إحنا مش فشلة.. وتحدي
أبوه عشان يثبت العكس بالنيابة عن نفسه وعن
جيله..

عصام : أنت هتتريق ... أنت كمان!

حمدي : بهذر يا أخى ...

نبيل : يعني ورط نفسك يا أبو السباع ...

عصام : لا ورطه ولا حاجه ... أنا فعلاً قبلت التحدي
... وقررت أشتغل ...

حمدي : حلوة ... حلوة في الجون يا أبو السباع
أنت المفروض بقى تعمل إعلان صغير في
كل الجرايد الحكومية والخاصة.. عشان
كل شركات مصر تقدم عطاءاتها لحضرتك..
وحضرتك تتكرم عليهم وتختار الشركة اللي
هيكون لها شرف خدمتك فيها...

عصام : هتتريق تاني يا حمدي.

نبيل : مش قصده كده يا أخي... قصده إنك بتدور معانا على شغل بقالك كام شهر.. وجاي دلوقتي تقول إن أنا قررت أشتغل ... أمال أنت لما كنت بتدور علي شغل معانا كنت مقرر إيه؟.

حمدي : قول له يا نبيل والنبى ...

عصام : يا ابني انتوا مش فاهمين حاجة..

حمدي : اتفضل فهمنا يا أستاذ !...!

عصام : إحنا لما دورنا على شغل اعتمدنا علي المكان اللي إحنا فيه... ولما ملاقيناش قعدنا وخطينا إدينا علي خدنا ... وبكده وقعنا في غلطتين...

نبيل : ... اللي هما ...؟

عصام : الأولى إن إحنا حبسنا نفسنا في المكان اللي إحنا فيه ... ومفكرناش نخرج منه وندور في أماكن تانية ... والغلطة التانية إننا بندور إحنا الثلاثة مع بعض مع إن الصبح إن كل واحد مننا يدور لوحده وفي مكان مختلف.. واللي ربنا يكرمه فينا يساعد الباقيين عشان كده

أنا قلت إن أنا قررت أشتغل ... بعد ما فكرت
صح ...

حمدي : ... فكرة مش بطالة..

نبيل : بس المهم التنفيذ.

عصام : أنا خلاص نويت.. وأبويا في انتظار
قراري ما فضلش غير إني أخذ موافقته.

حمدي : ونويت علي فين إن شاء الله ...؟

عصام : القاهرة ... هسكن في العمارة اللي كنا فيها
واحنا طلبة، وحتى لو اتحركت لمكان تاني
أخباري كلها هتلقوها عند عم صابر اللي شغال
في محل العطارة اللي علي ناصية الشارع.

نبيل : بالتوفيق يا عصام إن شاء الله.

عصام : و أنا أعرف أخباركم إزاي ...؟

حمدي : متقلقش هتوصلك ... طازه بطازه.. إن شاء
الله ساك على الشاي يا سمعه ... مش يله
بيننا..

عصام : ... يله ...

نبيل : ... كده ...

حمدي : هشربك شاي منجهه

نبيل : ... (بمزاح) ... خاين ... خاين ... (الجميع
يضحك) ...

[illegible]

*** (ثم تخفت الأضواء ويُغلق الستار) ***

الفصل الثاني

المشهد الأول

* المكان : عطاره عبد الغني سعيد.

* الزمان : العاشرة صباحًا.

**** (سندس تدخل إلى المسرح، يظهر علي وجهها
علامات السرور والارتياح، ثم تفتح المحل وتخرج
كراسة الحسابات وتجلس أمام المحل)****

سندس : ياااااااااااه كابوس وانزاح ... (ثم تتقدم أمام الجمهور) ... بس على الله ينزاح علي طول وميطلعش بسبع تراوح ويرجع ينط لي في الدكان من ثاني، ياه قد إيه أنا بكره الراجل ده.. واقف لي زي الشوكة في الزور علي الله يا رب ما يقوم منها النوبة دي.. اللي ما يتسمى صابر قال اسمه صابر قال دكان المفروض هوه غتت رزل مش صابر والأدهى من كل ده إن الحاج عامله صاحبه، وبيثق فيه علي إيه مش عرفه عامله سحر ده يا اخواتي دا لو عامله سحر كان "ورداني" أخويا فگه.. ياه هتنقط إمتي يا رب أخلص منهم بقه ... (ثم تتأوه في غيظ)..

**** (في هذه الأثناء يدخل ورداني وهو رجل متوسط العمر وذو لحية)****

ورداني : السلام عليكم ... يا ست سندس..

سندس : بسم الله الرحمن الرحيم ... (تتفل: تف . تف . تف . تف . تف)

همّا بيطلعوا إمتي دول كمان أشتاتنا أشتوت دا بيحي ع السيرة.

ورداني : إزيك يا سندس يا بنت أبويا وأمي.

سندس : زي ما أنت شايف إيه اللي حدفك عليّ
النهارده يا ورداني .

ورداني : جاي أشوفك يا بنت أبويا وأمي فيها حاجة
دي .

سندس : متشفش وحش يا خويا بس مش عوايدك
تجيلي الدكان.

ورداني : إنتي اللي مش عوايدك تقعدي في الدكان
أمال فين عم صابر.

سندس : عمك صابر ... عيان النهارده ... في النزاع
الأخير.

ورداني : حلو ... والحاج أكيد عنده بيزوره ...
ومفيش حدّ يقف في الدكان والمخزن غيرك ...؟

سندس : تقصد إيه يا ابن أبويا وأمي ...؟

ورداني : كل خير يا بنت أبويا وأمي ... الملعب قرب
يفضى لكِ وتقشي كل اللي حواليك من غير
ولد بس متنسش ورداني أخوكي الغلبان .

سندس : دا أنت جاي تُقرّ بقه يا خويا.. كلامك كده فيه
إنّه.

ورداني : أستغفر الله.. أستغفر الله.. لا إلهة ولا ثم..
أنا كل ما هُناك بِفَوْقِكَ لتكوني نائمة ولا حاجة..
وعلي رأي المثل النائم في زمة الصاحي..

سندس : لا اطمئن من الناحية دي أنا فايقة
ومفجلة عينيه الاثنين حتى الناموسة اللي
بتطير حواليا بوقفها في الجو وأعمل لها بدل
المخلفة ثلاثة حزام أمان وطفاية حريق وسرعة
زيادة.

ورداني : والله كبرتي وطلعلك مخالب يا سندس يا بنت
أبويا وأمي .

سندس : تلميذتك يا ابن أبويا وأمي.

ورداني : إنتي بترمي الكورة في ملعبى يا سندس
عشان تحسسيني بالذنب ربنا يعلم إن أنا كنت
بعمل كل ده عشانك أنتي ويا خوفي بعد دا كله
تطوعي غرورك وتخدينا في الرجلين.

سندس : متقلقش يا ورداني أنا برضو لسه عندي
أصل ممكن بقى تقولي أنت عايز أيه بسرعة كده
قبل ما حد يجي و يشوفك هنا من العصافير اللي
بتبيت في قفص عم صابر.

ورداني : هو أنا شخص غريب عندك لا سمح الله ولا
حاجة.

سندس : مش القصد يا اخويا أنا عاملة بس حساب العصافير وخصوصاً إن أنا في حالة طوارئ.

ورداني : في دي عندك حق القصد أنتي عارفة إن اليومين دول الشغل مخسّع شوية معايا وأخواتك محتاجين مصاريف.

سندس : ... (مقاطعاً) ... متكملش يا ورداني وبلاش يا اخويا تدخل عليا ألدخلة دي وفرها لحد من الزباين ولا حاجة.. أخواتك مش ناقصهم حاجة كل اللي بيطلبوه بيخدوه وبزيادة، أما بالنسبة لكِ فأنا مش مقصرة.. آخر مبلغ أخذته كان كام يا ورداني؟! .

ورداني : ما هو ... ما هو.....!!!!!!!

سندس : ما هوش يا خويا ... ما هوش ... واخذ خمسمائة جنيه.. جنيه ينطح جنيه دا غير البضاعة اللي بسحبها من الدكان علي حسك وأقيدها على عم صابر وغالبًا بلغ بيها الحاج.

ورداني : بس البركة فيكي برضو يا سندس.

سندس : البركة في ربنا يا اخويا ... والرحمة حلوة وعلى رأي المثل إن كان حبيبك عسل.. وبعدين حسب ما بلغني إن الشغل ماشي معاك زي

الحلاوة ومش واقف زي ما أنت بتقول أنا مش
بأقرّ عليك لا سمح الله.

ورداني : لا.. قرّي يا سندس ... و بيقولوا إيه كمان
?...؟

سندس : لا بيقولوا ولا بيعيدوا اعمل بلقمتك يا
أخويا وأنا هعمل بأصلي ومش هقصر معاك..

ورداني : ... طلباتك ...؟

سندس : تعلمي حجاب للمدعوق صابر ... حجاب
ميخرش المية.. آه ميخرش المية مش زي دوكها.

ورداني : من الناحية دي اطمئني وحطي في بطنك
بطيختين واحدة صيفي والثانية شتوي.. هاعمله
حجاب مغادرة بلا عودة...

سندس : بس علي الله ميكنش زي اللي قبله!!!!!!

ورداني : لا وحياتك النوبة دي هزود له العيار
شويتين وإن شاء الله هيجيب نتيجة .

سندس : أما أشوف ودلوقتي تقدر تتفضل من غير
مطرود عشان العصافير يا أخويا .

ورداني : طيب السلام عليكم ... (يقولها بغيط) ...

**** (ثم يخرج من المسرح) ****

سندس : وعليكم.. على الله النوبة دي تعمل
بلقمتك و متخبيش ظني فيك ... (حالة انتباه)
... الله دا ما فيش ولا زبون جه لغاية دلوقتي يا
خوفي يا ورداني لتكون عملتلهم عمل هم كمان!!..
دا كانت تبقي خيبة.. أما أوصل لغاية البيت اطمّن
وأرجع تاني.

***** (ثم تغلق الدكان، وفي هذه الأثناء تُخَفَّف الأضواء
ويغلق الستار) *****

المشهد الثاني

* المكان : منزل عصام .

* الزمان : الرابعة عصرًا.

**** (يُفتح الستار على عصام، يظهر علي المسرح وفي يده حقيبة السفر)****

عصام : ... (محدثًا نفسه) ... يااااه معقول
هتغرب تاني عن البيت يااااااه و النوبه دي
رايح أدور على شغل يعني رايح أتبهدل بس
على الله ألاقي شغل مناسب ... يااااااه البيت
هيوحشني وأبويا وأمي وحمدي ونبيل حتى الولاة
سمعة ورنه صينية الشاي وأيوه جااااااي سريع
سريع ... (في لهجة تقليد لسمعه) ... عُلْم
وجاري التنفيذ ... وهو ولا جاي ولا حاجه يا الله
هتوحنوني يا ولاد الإليه رغم إنهم فقر ونحسوني
و جبولي الفقر إلا أنهم بيوحنوني ... ياه ياه ...!!

**** (في هذه الأثناء يدخل عبد الحميد إلى المسرح) ****

عبد الحميد : خلاص يا عصام نويت...؟

عصام : دا بعد إذنك يا بابا .

عبد الحميد : ربنا يصلح حالك يا بني ... أهم حاجة تكون مقتنع بقرار السفر من جواك عشان تقدر تقاوم كل العقبات اللي ممكن تقبلك بعد كده

عصام : متقلقش يا بابا دا تحدي وأنا مش هقبل إنني أصغر نفسي قدامك..

عبد الحميد : وأنا واثق إنك هتكسب وأتمنى كده ... (ثم يحتضن ابنه) ... مش هوصيك يا أبنني احترامك لنفسك بينعكس على الآخرين وحبك لعملك وإتقانك هما دليلك القوي.. خلي بالك من نفسك يا ابنني الله يخليك عايزك تكون راجل قد المسئولية ربنا يوفقك ويحفظك ويحميك.

**** (ثم تدمع عيناه) ****

عصام : أmaal فين أمي ؟ ... (يهرب من حدة الموقف).

عبد الحميد : بتجهز لك الأكل اللي هتاخدوا معاك .

**** (ثم تدخل أم عصام زينب إلى المسرح)****

زينب : جهزت لك الأكل اللي هتخذه معاك خالي
بالك من نفسك يا بني وابقى طمّني أول بأول
وإياك من اتنين يا ضنايا .

عصام : ... (وهو يضحك) ... عارفهم: حمدي ونبيل؛
اطمّني ما همّش رايعين معايا .

زينب : مش قصدي أفصد الشيطان وأصحاب السوء .

عصام : برضو مرحناش لبعيد هما حمدي ونبيل مش
كده يا بابا ... (ثم يعودان للضحك) ... أيوه كده
أضحكوا أحسن ما نقلبها دراما.

عبد الحميد : أيوه كده بقلنا كثير متلمناش مع بعض
ومضحكناش بالشكل ده..

زينب : ربنا يجعل أيامك كلها سعادة وضحك .

عبد الحميد : يا رب أكيد يا عصام هتبعثلنا كل شوية
وطمنا على أخبارك .

زينب : طبعًا ودي حاجة عايزة كلام ..(ثم
تبكي)... هتوحشني قوي يا ابني .

عبد الحميد : وبعدين يا زينب هو عصام صغير ...

عصام : أنا كده هامشي فعلا قبل ما تقلب دراما بجد.

عبد الحميد : إستنا يا عصام كنت هنسى خلي المبلغ ده معاك أكيد هتحتاج له.

عصام : أيوه يا بابا بس أنا لسه واخد منك فلوس امبارح.

زينب : وماله يا حبيبي أهم متشالين معاك للطوارئ محدش عارف الظروف شكلها إيه .

عبد الحميد : كلام أمك مضبوط وخذ معاك الظرف ده كمان ...

عصام : و إيه ده كمان ...؟

عبد الحميد : دا جواب لواحد صحي كان معايا زمان في الجيش اسمه عبد الغني سعيد عرفت من فتره أن ربنا فتحها عليه.. ودا صديق من الأصدقاء اللي أنا بعتز بيهم إن مشغلكش شغل عنده على الأقل هيساعدك لغاية ما تقف على رجلك.

عصام : متشكر جدًا ولو اني ما كنتش عايز مساعدات في البداية عشان ده تحدي .

عبد الحميد : يا سيدي أنت لسه في بداية الطريق
ومحتاج لزقه.

زينب : ... (مقاطعة) ... كلام أبوك صح يا عصام
أنت طالع على الله يا ابني ومحدث عارف رزقه
فين جازر الجواب ده يوفر عليك تعب القلب .

عصام : ... بس!!!!!!!.

عبد الحميد : ... (مقاطعة) ... ما مبسش سبها
علي الله أنت لأول ولآخر واحد يمشي بجواب
وسطه يله بينا بقى عشان متأخرش .

عصام : يله يا بابا أشوف وشك بخير يا ماما.

زينب : ... (وهي تبكي) ... مع السلامة يا ابني
وخلي بالك من نفسك ... لا إله إلا الله ...

عصام : ... (وهو خارج) ... محمد رسول الله.

زينب : ... (تقف في مواجهة الجمهور) ...
هتوحشني قوي يا ابني ربنا يغنمك السلامة
ويوقف لك ولاد الحلال يا رب ... (ثم تشمّم
في كذا اتجاه) ... باين حلة الطبخ اتحرقت .. يا
رب ما تكون اتحرقت .

**** (ثم تسرع في الخروج من المسرح) ****

***** (ثم تخفف الأضواء ويُغلق الستار) *****

المشهد الثالث

* المكان : محطة الأتوبيس.

* الزمان : العاشرة صباحًا.

**** (تفتح الستار على ميدان عام، وعصام واقف في انتظار الأتوبيس يلوح حشدًا من الناس يقترب منهم، وأمامهم مسرح يقف عليه رجل ينادي مثل الحاوي)****

خميس : قَرَّب.. قَرَّب.. قَرَّب.. حلول سريعة لكل المشاكل والخلافات الزوجية والعائلية؛ حكم ونصائح دوا النفوس بأقل الفلوس ... قَرَّب يا محتار.. قَرَّب يا تعبان.. قَرَّب.. قَرَّب.. قَرَّب...

عصام : هو إيه ده ... (مخاطبًا شخصًا بجانبه) ...

رجل ١ : دي نصبة الشيخ ورداني ... راجل مبروك...

عصام : ومين الراجل اللي واقف على المسرح ده .

ياسين : ... (وهو من أعوان ورداني) ...
(مقاطعًا) ... ده عم خميس الكشف بتاع
الشيخ ورداني اللي بيحجز للناس عند الشيخ
المبروك .

عصام : يعني إيه الكشف ... ؟

ياسين : كشف يعني لامؤاخذه بيكشف الناس اللي
لها الأولوية في مقابلة... المبروك ...

عصام : والله ما أنا فاهم حاجة...!!!

ياسين : دلوقتي تفهم كل حاجة وتشوف بعينك العجب
عيانًا بيانًا..

راجل ١ : باين سيدنا الأفندي مش مصدق.

ياسين : ما هو الواحد الجاهل لامؤاخذه بيبقى في
الأول كده لكن لما يقرب من المبروك وتفوح عليه
روايح وتجليات مولانا يحلم ويتمنى ...

عصام : ... (بنرفزة) ... أنا جاهل ...؟

راجل ١ : ما يقصدش يا سي الأفندي .

ياسين : ... (مقاطعًا) ... أنا قصدي اللي ميعرفش .

عصام : لا يا سيدي أنا عارف

ياسين : تعرف إيه لامؤاخذه

راجل ١ : (مقاطعاً) ليكون سيدنا الأفندي
مبروك هو كمان ...؟

ياسين : مبروك إيه أنت كمان هو المبروك بيلعب ولا
حاجة .

عصام : ... (يضحك) ... أنا لا مبروك ولا حاجة
بس فاهم كل اللي بيحصل ده كله جهل وشعوذة
ودجل وضحك علي الغلابة بالأونطة.. وأتحداك
لو في حاجة صحيحة من اللي بيحصل ده

ياسين : ... (مفاجئاً لعصام) ... وأنا قبلت التحدي
ومستعد أحجز لك دلوقتي عشان تشوف وتعرف .

عصام : وأنا موافق ... تمن الحجز كام

ياسين : اتنين جنيه بس يا أفندي ... ولو معكش ممكن
أدفع لك .

عصام : لا يا سيدي كتر خيرك ... اتفضل ...

ياسين : اسم الكريم إيه يا أفندي ...؟

عصام : عصام عبد الحميد ...

ياسين : ... (محدثاً رجل ٢) ... وأنت يا أبا الحاج
حجرت ولا لسه ؟

رجل ٢ : كتر خيرك يا عم ياسين ... دا أنا حاجز من بدري ...

**** (ثم ينطلق ياسين بين الناس ويعرف الأخبار،
ويبلغها لخميس وخميس يبلغها لورداني الجالس
خلف الستارة) ****

عصام : والله أنا حاسس إن الراجل ده نصاب وبيعمل كل ده عشان يطلع بحاجه ومش بعيد يكون شغال معاهم!!!!

رجل ٢ : متقولش كده يا سي الأفندي دا عم ياسين ده راجل طيب دا يبقى ابن أخت عم خميس الكشف.. وكويس إنك وقعت فيه عشان يحجز لك دا الحجز هنا بصعوبة ...

عصام : خلينا ورا الكداب لحد باب الدار ... أما أشوف ...

خميس : ... (يعلو بصوته فيصمت الجميع) ...
قرب.. قرب.. قرب .. (ثم يشير إلى
رجل قائلاً) ... تعالى يا حاج ...

رجل ٣ : ... حاج ... ربنا يسمع منك ويبشرك بالخير

خميس : إيه مشكلتك؟

رجل ٣ : مشكلتي كبيرة قوي وقالوا لي محلهاش إلا
الراجل البركة .

خميس : أيوه أنا عارف يا حج ... بس إيه هي المشكلة
زوجية ولا عائلية...؟

رجل ٣ : ... (يقترب من خميس ويكلمه في أذنه)
... هي بيني وبين مراتي لامؤاخدة .

خميس : تبقى زوجية.. اتفضل يا حاج ...

رجل ٣ : بصريح العبارة مراتي زي ما يكون معمول
لها عمل ...

خميس : إيدك على خمسين جنيهه.....

رجل ٣ : بس ده كتير قوي

خميس : أنت هتبسبس ... متعطلناش أرجوك عشان
نشوف غيرك دا أنت هتقابل الشيخ ورداني ...
مداوي النفوس ...

رجل ٣ : طيب ... طيب مبيقاش قلبك حامي كده ...
(ثم يُخرج من حافظته المبلغ) ...

خميس : اتفضل أقف ورا الستارة وهو هيكلمك

الشيخ ورداني : قول اللي عندك على طول .. يا هارون يا ابن بهلول ...

راجل ٣ : ... (جسمه ينتفض ثم ينظر للخلف والفرح يكاد ينطق من وجنته) ... الله أكبر . الله أكبر ... الشيخ عرف اسمي من قبل ما أتكلم ... (الجميع من خلفه) ... الله أكبر . الله أكبر ...

خميس : ... (وهو أيضًا يصيح في الناس ... الله أكبر ...) ... مش قولت لكم.. الشيخ بركاته ملهش حدود ...

راجل ٣ : ... (يعود للحديث مرة أخرى) ... مراتي يا مولانا ..!!!!!!

الشيخ ورداني : ما لها؟

راجل ٣ : بقالها خمستاشر سنة مبتخلفش ... لفيت بيها على كل الحكماء ما لقتش فايده ... لغاية ما ولاد الحلال دلوني عليك ريحني يا مولانا الله يريح قلبك .

الشيخ ورداني : مراتك معمول لها عمل ...

راجل ٣ : يا ساتر يا رب والعمل يا شيخ ورداني ...

الشيخ ورداني : العمل معمول على فتلة في جاك
أحمر قديم فوق تل غربيكم.. الحق الجاكت
واحرقه قبل ما يدوب في الأرض أو حد يسرقه..
ووگل مراتك معلقة غسل أبيض كل يوم على
غيار الرقيق واستغفر ربك وقول يا معين

راجل ١ : ... الله اكبر ... يسلم فمك يا شيخ ورداني
... الله أكبر ...

الشيخ ورداني : متأخرش أكثر من كده وأوعك الليل
يدخل عليك .

راجل ٣ : ... ربنا يخليك لنا يا بركة ... (ثم يخرج
من المسرح وهو مسرور) ...

راجل ٢ : ... (يتقدم) ... عندي مشكلة كبيرة يا
مولانا ومش لاقى لها حل ...

خميس : حلها عندنا بإذن الله ... بس إيدك علي
خمسين جنيه...

رجل ٢ : بس دا كتير قوي ...

خميس : هتدفع ولّا؟

راجل ٢ : مفيهاش ولّا ... الأمر لله كّله يهون ...
عشان خاطر الراجل البركة.

خميس : ... (بعدما يأخذ الفلوس) ... اتفضّل
الشيخ في انتظارك تكلمه ...

راجل ٢ : أنا عندي حمار يا مولانا مغلّبي كل شوية
جايب لي مشاكل مع الخلق ...

الشيخ ورداني : ... عمل إيه ...؟

راجل ٢ : مرة جرى مني و أنا رايح بيه السوق قام
خبط عيل وقّعه في التّرة.. ومرة نزل زرة
جاري أكل منها وخربها.. ومرة نطح بكرية
وهي حامل كانت هتموت لكن ربنا سترها.. غلب
حمار حماري معاه.. و وعدت سيدي مذكور
وقلت شلها يا سيدي مذكور يا تيجي للحمار
بيعه يا يموت وأرتاح من شره ثاني يوم مكذبتش
خبر ...

الشيخ ورداني : ... مات ...؟

راجل ٢ : ياريت ... الجاموسة اللي حيلتي يا مراري
فيها ... هي اللي ماتت... والحمار قاعد في
قرببيذي زي العمل الرضي ...

الشيخ ورداني : أنت كنت بتعز الجاموسة اكثر من
الحمار ... ؟

راجل ٢ : أبداً يا مولانا ... ربنا يعلم ... إن معزتهم
عندي كانت واحدة رغم إن الجاموسة هي اللي
بتوكلنا ...

الشيخ ورداني : والحمار كنت بتقضي بيه مصالحك

...

راجل ٢ : ما هو كمان دفعني تمنها مشاكل من هنا
ومن هناك... مكنتش أتخيل أبداً ... إن الحمار
يئس عليّ بالشكل ده يا سيدنا الشيخ .

الشيخ ورداني : كنت بتزكى عليه

راجل ٢ : ... (بتردد) ... أيوه طبعاً ...

الشيخ ورداني : متكذبش ... أنت مكنتش بتزكي عليه

...

راجل ٢ : ما هو أصل .

الشيخ ورداني : ... (مقاطعاً) ... لا أصل ولا قلة
أصل عشان كده سكن الحمارة الجنّ شهور .

راجل ٢ : ... (مقاطعاً) ... يا حيّ يا قهار ... الرحمة
... الرحمة ...

الشيخ ورداني : زكي عن حمارك يزيد مالك ... لا
النار تحرقك أنت وأمثالك.... وإياك ترجع تانى
كذاب..

راجل ٢ : ... (يرجع للخلف ويرتجف) ... أعوذ بالله
... السماح ... السماح..

الشيخ ورداني : وإياك تفترى على أهل البيت ... الله
أكبر .. الله أكبر

خميس : ... (يصيح في الجماهير) ... الله أكبر ...
الله أكبر ... (الجميع يردد خلفه) ...

راجل ٢ : ما شاء الله يا أهل البيت ... الله أكبر ... الله
أكبر ... طب والحمار يا مولانا ...

الشيخ ورداني : بص تحت رجليك تلاقى حجاب
أخضر خده وعلقه علي رقبة الحمار وقول يا
هادي الهدى يا رب ... يا حيّ يا قيوم ... و
سيب الأمر لصاحب الأمر ... حيّ ... و
دلوقتى ميعادك خلص..

راجل ٢ : (ينظر تحت قدميه) أيوه
صحيح الحجاب أهه ... الله أكبر ... (وهو
خارج والجميع من خلفه الله أكبر.. بركاتك يا
شيخ ورداني) ...

خميس : ... (يصيح) ... الله أكبر ... الله أكبر ...

ياسين : ... (يتقدم نحو عصام) ... شفت يا سيدنا
الأفندي يله بقى علشان تاخذ دورك .

عصام : هو الراجل اللي طلع من شوية ... صاحب
مشكلة الحمار ... هو اللي كان واقف هنا .

ياسين : أيوه يا أفندي ... هو بعينه صاحب مشكلة
الحمار والجاموسة .

عصام : آه بس أنا معنديش لا حمار ولا جاموسة .

ياسين : بس أنت عندك مشكلة ... وكمان في تحدي
بيننا .

عصام : هي مش مشكلة قوي بس أنا إديتك كلمة وأنا
قدها إن شاء الله وهتبت لك أن كل ده عبارة عن
كلام فاضي وشعوذة .

ياسين : وأنا معاك اتفضل ورينا .. (ثم يسبق عصام
ويتحدث مع خميس) ..

خميس : ... (محدثًا عصام) ... إيه مشكلتك؟ .

عصام : وإيه الفرق؟!!

خميس : الفرق كبير يا أفندي ... كل مشكلة ولها تمن
... أرجوك متعطلناش ... (في هذه الأثناء
ينادي ورداني علي خميس) ... أيوه يا مولانا .

الشيخ ورداني : ... (يتحدث من خلف الستارة) ...
اللي قدامك ده آخر واحد هقبله النهارده ...

خميس : ليه يا مولانا ... دا إحنا لسه بدري والحركة
ماشية وزيّ الفل .

الشيخ ورداني : اسمع الكلام اللي بقولك عليه ...
في عيون للشرطة هنا وإحنا مش ناقصين
مشاكل .

خميس : اللي تشوفه يا مولانا ... ربنا بيتليهم
بأذيه ولاد المؤذية ... (ثم يتحرك نحو الجمهور
وبصوت عالٍ) ... الله أكبر ... الله أكبر ... يا
إخوانا الشيخ مش هيقدر يكمل النهارده واللي قدمنا
ده آخر واحد هيقبله الشيخ النهارده متنسوش
معادنا الأسبوع الجاي ... إن شاء الله .

... (الجميع وهو خارج من المسرح يهرول بأحاديث
جانبية) ...

راجل ٤ : لسه هنستني الأسبوع الجاي ...

راجل ٥ : يله كله يهون عشان خاطر البركة..

راجل ٦ : ربنا يكتبلنا مقابلته ...

أمراه ٧ : ربنا يكتب لنا مقابلته ...

أمراه ٨ : بركاتك يا شيخ ورداني ...

خميس : ... (والجميع خارج من المسرح) ...

متنسوش ميعاد سيدنا الشيخ داوي النفوس ...

ومريح القلوب حلال العقد والمشاكل اللي

بركاته ملهناش حدود ... (في هذه الأثناء

يخرج الجميع من المسرح) ... أيوه يا أستاذ قلت

لي إيه مشكلتك ...

عصام : ... (وهو مستنفر) ... عايز نصيحة ...

خميس : إيدك علي ثلاثين جنيه .

عصام : تلاتين جنيه ليه؟! ... أنا مش مزنوق لها

قوي بس بنقول من باب العلم بالشيء ...

ياسين : إيه يا أفندي هترجع في كلامك ولا إيه

متحرجنيش مع خالي خميس أنا حجزت لك

بالعافية ... و من حسن حظك إن الشغل وقف علي

قدّ دورك .

عصام : أنا مبرج عيش في كلامي ... بس ...

خميس : ... (مقاطعًا) ... مبسش ولا حاجه ... دا أنت لولا جاي من طرف ياسين ابن أختي ما كنتش قابلت البركة شفت الناس اللي مشت دي كلهم طمعانيين في مقابلة البركة وعلى استعداد يدفعوا الطاق طاقين بس البركة استكفى النهاردة على قدّ دورك ... ودا من حظك ...

عصام : أكيد من حظي ... أهّي توريطة والسلام ... اتفضل يا سيدي ... (مخاطبًا بها خميس ثم يدفع له النقود) ...

ياسين : بلاش التشاؤم ده يا سيدنا الأفندي ... إن شاء الله حظك هيطلع زيّ الفل ...

خميس : .. (يعد النقود ثم يشير له بالتقدم نحو الستارة) .. اتفضل يا أفندي

عصام : ... (يتقدم نحو الستارة) ...

الشيخ ورداني : إيه طلباتك يا عصام ؟ .

عصام : بسم الله الرحمن الرحيم ... عرفت اسمي منين .

الشيخ ورداني : متسألش عن دي ... اسأل علي اللي أنت جاي علشانه .

عصام : عايز أشتري نصيحة ... أجرب بيها حظي في الحياة .

الشيخ ورداني : حظك حلو إن شاء الله .

عصام : يا ريت ... بس تفتكر إن النصيحة ممكن تتباع في القرن العشرين ... ممكن الكلام يبقى له تسعيرة .

الشيخ ورداني : و ليه لأ... إذا كان الإنسان النهاردة مش قادر يستجيب لمتطلبات الواقع ... برغم أن العلم متاح للجميع ...

عصام : تفتكر ليه ...

الشيخ ورداني : علشان كل ده .. ميسر؛ ما جعناش له طاقة.. ممشيناش له مشوار ... لكن لو حسينا ولو اللحظة واحدة إننا لازم نتعب علشان نوصل لهدفنا كان كل إنسان مننا قدر يحل مشاكله بنفسه .

عصام : مش يمكن ظروف الحياة .. والتوتر والنفسية اللي ينتج عنها ... حالة الإحباط هي السبب ... (في هذه الأثناء يبدو خميس وياسين نائمين في جانب من المسرح) ...

الشيخ ورداني : يمكن ... لكن برضو مش مبرر
على إني أتجاهل اللي حواليا... ومخدش بأسباب
الفشل والنجاح ...

عصام : دا إذا كانت ... مغريات الحياة أقوى ...
والنفسية ضعيفة ومشتتة..

الشيخ ورداني : في الحالة دي تبقى النصيحة أوجب
...

عصام : أم فلوس ولّا أم بلاش؟!...

الشيخ ورداني : لا ... طبعا أم فلوس..

عصام : ... (باستغراب شديد) ... ليه ...؟

الشيخ ورداني : لأن أم بلاش مش هتعمل بيها ...

عصام : مش فاهم؟

الشيخ ورداني : أفهمك ... أنت مثلا كام نصيحة خدتها
في حياتك ... من البيت أو المدرسة أو من قدوة..
أنت بتعتز بيها ...؟

عصام : كتير ...

الشيخ ورداني : كام واحدة عملت بيها

عصام : مش فاكرو.. بس أعتقد إنني عملت ولو بواحدة علي الأقل ...

الشيخ ورداني : مفكرش إنك عملت ولو بواحدة ...

عصام : ... وإيه دليلك؟ ...

الشيخ ورداني : مش محتاجة دليل لأنك لو عملت و لو بواحدة مكنتش جيت هنا ...

عصام : ... (يومئ برأسه موافقاً) ... يجوز ...

الشيخ ورداني : تفكر إنك اقتنعت ...

عصام : ... ممكن ...

الشيخ ورداني : ... لأ لسه ...

عصام : ... ليه ...؟! ...

الشيخ ورداني : لما تاخذ النصيحة وتعمل بيها ... وتشوف النتيجة ... ساعتها بس تقدر تقول انك اقتنعت ...

عصام : ممكن أطلب طلب ...؟

الشيخ ورداني : ... اتفضل ...

عصام : ممكن أشوف اللي بيكلمني ...؟

الشيخ ورداني : مينفعش ... خليك في اللي أنت جاي
عشانه

عصام : ماشي إيه هي النصيحة بقى؟

الشيخ ورداني : خد حجاب من اللي قدامك ... وافتحه.

عصام : ... (يأخذ حجاباً ويفتحه) ... الصبر مفتاح
الفرج يااااااه ما أنا عارف ... و أيّ حدّ
يعرف ... النصيحة دي ... من غير ما يشتريها .

الشيخ ورداني : بس مش بإمكانك تعمل بيها ...

عصام : ... ليه ... ؟

الشيخ ورداني : لأنها ببلاش ...

عصام : ... (يحدث نفسه في جانب من المسرح) ...
شيء غريب كلامه مقنع جدًّا رغم إني مش
مرتاح له.. الأمر لله أجرب حظي في نصيحة
تانية.. ربما ...

خميس : ... (وهو سامع لعصام) ... لا يا حلو كل
شيء بتمنه ... عايز نصيحة كمان إيدك على
المعلوم .

عصام : ... و المعلوم كام ...؟

خميس : ... ثلاثين جنيه...

عصام : الأمر لله ... خد يا سيدي ...

خميس : ... (بعد أن يأخذ الفلوس ... يعود للنوم
مرة ثانية) ...

الشيخ ورداني : خد كمان حجاب أبيض واقتحه ...
إدي الأمانة لمن آمنك ولا تخن من خانك..

عصام : يا سلام مادي كمان أنا عارفها ومش محتاج
أشترئها .

الشيخ ورداني : برضو ما كنش بإمكانك تعمل بيها
زمان .

عصام : ... طب إيه الفرق ... ؟

الشيخ ورداني : الفرق كبير طبعًا.. النهارده لازم
تعمل بيها ... لأنك اشترتها بفلوس ... أما زمان
كانت ببلاش ...

عصام : ... (في جانب من المسرح) ... معقول بس
أنا برضو مش مقتنع.. أجرب حظي بقى في
الثالثة والثالثة ثابتة زي ما بيقولوا ... جاي
يكون فيها الخير ... (ثم يتجه نحو خميس) ...

خميس : ... (يفرع من نومه) ... إيدك يا حلو على
المعلوم التالت ...

عصام : طب ما تنزل السعر شوية في الثالثة ... دانا
شاري انتين قبل كده ...

خميس : أنت هتفاصيل يا أستاذ ... هو إحنا بنبيع
خضار.. دا كلام الشيخ ميتقلش بمال .

عصام : ما قلناش حاجة يا سيدي ... بس الرحمة
حلوة.

الشيخ ورداني : ... (مقاطعاً) ... خد منه نص المبلغ
بس يا خميس .

عصام : اهو ... الشيخ بيقول لك خد منه نص المبلغ
بس أهه ... (ثم يخرج له الفلوس) ...

خميس : خليه عشرين عشان المرة الجاية نحجز لك
بدري ونمشيك بدري .. (بصوت خافت) ..

عصام : لا مرة جاية ولا رايحة ... هم خمستاشر جنيه
بس.. اتفضل ...

خميس : يا سلام على طيبة قلبك الزايدة دي يا
مولانا هي اللي طمعت فينا الناس بالشكل
ده ... اتفضل يا سيدي ... (يشير لعصام بالتقدم
حتى الستار) ...

عصام : يزيد فضلك ... (ثم يقترب من الستارة) ...
وايه النصيحة الثالثة يا ترى .

الشيخ ورداني : خد حجاب أبيض كمان ...

عصام : طب متخليه النوبة دي أخضر ... الأبيض
طلع حظنا وحش معاه .

الشيخ ورداني : ... أنت ما ينفعش معاك غير الأبيض

...

عصام : ... اشمعنا ... ؟

الشيخ ورداني : عشان الأبيض بتاع الحكم
والنصايح ... أما الألوان الثانية لها أمور ثانية
خالص بعيدة عن اللي أنت عايزه ...

عصام : ... اللي تشوفه يا مولانا ... (ثم يأخذ
حجاباً أبيضَ ويقرأه) ... حبيبك اللي تحبه ما
لكش عني عنه .. (ثم يضحك بصوت عالٍ) ..
معقول هو ده نهاية صبري ... يا الله ربنا يجعلنا
ننتفع بيه .

الشيخ ورداني : مش قُلت لك انك لسه مقتنعتش ...
بس تقدر تقول انك حطيت رجليك على أول
الطريق الصبح

عصام : ... إزاي ... ؟

الشيخ ورداني : طالما لقيت في الأحبة حاجات
غير ... اللي أنت كنت متوقعها يبقى هتفكر ...
ومدام هتفكر يبقى هتوصل .

عصام : مش عارف ... بس أنا حاسس إنني واقف
قدام لغز كبير مش قادر أفسره!..

الشيخ ورداني : موقف طبيعيّ ... لأنك هايب المكان
والكلام والحدث .

عصام : ... تفتكر ... ؟

الشيخ ورداني : ... طبعًا ...

عصام : ممكن أسألك سؤال شخصي ...؟

الشيخ ورداني : ... اتفضل ...

عصام : باين من كلامك أنك مثقف جدًا طيب ليه لجأت
للشغلانة دي ...

الشيخ ورداني : ... (مقاطعًا) ... قصدك الدجل ...؟

عصام : آسف خاني التعبير ...

الشيخ ورداني : وأنا قلت لك قبل كده خليك في اللي
أنت ... جاي عشانه ...

عصام : ... يا ترى ممكن أشوفك تاني ...

الشيخ ورداني : ... كل شيء بأوان ...

عصام : ... إزاي ...؟

الشيخ ورداني : يعني خليها للظروف ... ولو تهت ...
ألف مين يدلك ... بس أنا حابب أشوفك تاني ...
أنت ناسي انك لسه مقتنعش ...

عصام : ماش الحال يا مولانا ... (ثم ينتبه فجأة) ...
ياااااااه أنا تأخرت على السفر ... سلام عليكم
... (وهو خارج من المسرح مهرولاً) ...

الشيخ ورداني : في رعاية الله ... (ثم ينادي على
خميس وهو يقترب من الجمهور) ... يا خميس
يا واد يا خميس .

خميس : ... (كان نائمًا) ... أيوه يا مولانا...
... (المسرح خاليًا) ...

الشيخ ورداني : يا الله شطب عشان نروح ... وصحي
الواد ياسين ...

خميس : حاضر يا مولانا هو الراجل الأفندي مشى
...؟

الشيخ ورداني : أيوه يا أخويا مشى ... (وهو يقترب
من الجمهور) ... بعد ما صدع دماغنا ولبشنا
... كنت خايف ليطلع ضابط ولا حاجة ... بس

طلع مش وشّ ذلك والحمد لله ... (ثم يعود
للحديث مع خميس) ...ليه هو أنت كنت عايز
منه حاجة ...؟

خميس : لا ...بس كنت بقول يعنييخلص لنا
شوية الأحبة البيض دول ... عشان معلهمش
سحب قّد كده.

الشيخ ورداني : ليه يا خويا هو إحنا واخدينوا مقولة
.. كده فل أوي وكويس إن ربنا سترها .

خميس : مش قصدي ...بس الأفندي باين عليه زبون
سقع ... والزباين اللي من العينة دي قليلة...
اليومين دول ...

الشيخ ورداني : ... بالعكس يا غشيم ... هو ده الزبون
اللي تخاف منه لأنك متعرفلوش ضهر من وش
أما الفلاح البسيط ... بيسمع الكلام ويدفع المعلوم
ويمشي علي طول فرحان ومسرور .

خميس : يا ابن الجنّة يا مولانا من العصر عمال تخره
على هواه ... وتشترى منه في الكلام و متبعش ...!

الشيخ ورداني : أمال أنت فاكرها إيه يا طور .. (ثم
يضحكان سوياً) ...

خميس : ... فاكرها في الآوت ... وهي جون ...
والنبي الشيطان يقولك يا عمي ... (وهو
يضحك) ...

الشيخ ورداني : طب يله يا اخويا بقي صحلنا
الشحط اللي نايم علي جنبه ده وشطبوا أوام
... أوام عشان نروح قبل ما يطلعنا عفريت من
بتوع الشرطة ولا حاجة ... (ثم يخرج من
المسرح) ...

خميس : حاضر ... اصحى يا واد يا ياسين ... اصحى
يا شحط .. (يلكمه بيده) ..

ياسين : أيوه ... أيوه ... (وهو نائم)

خميس : ... (يلكمه مرة ثانية) ... فوق بقى يا ابن
المنحوسة.

ياسين : أيوه يا خال ... أنا صحيت أهه ... هو
الراجل لأفندي مشى يا خال خميس ..؟

خميس : ... مشى من بدري يا خفيف ...

ياسين : ... طب مصحتنيش ليه يا خال ... ؟

خميس : ... ليه نسيت معاه حاجة يا شحط ... ؟

ياسين : أيوه ... كنت داخل معاه في دور تحدي

خميس : ومين قال لك انك كسبت التحدي !....

ياسين : ... هو مش دفع لك المعلوم ... ؟

خميس : ... دفع يا خفيف ...

ياسين : ... خلاص يبقى أنا اللي كسبت التحدي ...

خميس : ... بس ده ماشي مفلس يا روح ننتك ...؟

ياسين : ... أهو برضو كنت هطلع منه بأيتها حاجة

....

خميس : وهو أنت مطلعتش ... أنت فاكرني نايم علي وداني ولا إيه ياوله ..؟!

ياسين : ... (وهو في حالة استنكار) ... هو في إيه يا خال ...؟

خميس : في اتنين جنيه لهفتهم من الأفندي تحت المنصة ... يا خفيف ...

ياسين : ... ما هو ...

خميس : ... (مقاطعًا) ... ما هواش ... روق المكان والحاجة عقبال ما أظبط المعلوم لمولانا ... وآخر الليل نتحاسب ... (ثم ينهره) ... شهّل يا شحط

الشيخ ورداني : ... (يظهر علي المسرح مرة ثانية
... ينظر إلى خميس وهو يعدّ الفلوس ثم يرى
خميس وهو يخبئ بعض الفلوس تحت جوربه
(... بتعمل ايه يا واد يا خميس .

خميس : ... (يرتبك) ... ما فيش ... يا مولانا ..
أصل .. أصل ..!!!!!!

الشيخ ورداني : دا مش أصل .. دي قلة أصل أنا مش
منبه قبل كده إنك متعملش العملة السوداء دي تاني.

خميس : ما هو.. ما هو...!!!

الشيخ ورداني : ... (مقاطعًا) ... خلاص أنت
هتتحق ... هات الفلوس اللي معاك ... وطلع اللي
تحت الشراب ... (ثم ينادي علي ياسين المنشغل
وهو يراقب الموقف بسرور) ... تعالى يا واد يا
ياسين خد يوميتك ...

ياسين : ... (يقبلها بشكل كوميدي) ... نعمة واللي
يكرها يعمي ..منتحرمش منك يا مولانا

الشيخ ورداني : وأنت يا خميس خد يوميتك..

خميس : من يد ما نعدمها يامولانا ... (ثم يقول بصوت
عالٍ) .. السماح .. السماح الله أكبر... الله أكبر...

*** (ثم يُغلق ستار) ***

المشهد الرابع

* المكان : بقالة عبد الغني سعيد .

* الزمان : العاشرة صباحًا .

*) يظهر علي المسرح عبد الغني سعيد جالسًا أمام
دكانه وفي يده سبحة *)

عبد الغني : يا فتّاح يا عليم.. يا رزّاق يا كريم ... (ثم
يجلس علي المقعد أمام دكانه يتفحص دفتر
الحسابات) ... ربنا يقـومك بالسلامة يا عم
صابر ياااااااااااا ... قد إيه الراجل الطيب ده شقى
معايا كثير ... واتحمل عشاني كثير حاسس ببيك يا
عم صابر ... و زيّ ما أنت صابر وبتقول كل
شيء بأوان ... أنا كمان زيّك بقول كل شيء
بأوان ... أكيد ... لا حول ولا قوة إلا بالله..(في
هذه الأثناء يدخل عم صابر ويبدو عليه الإرهاق).

عم صابر : السلام عليكم ...

عبد الغني : (مقاطعًا) وعليكم السلام ..ايه اللي قومك
من سريرك يا عم صابر ...أنت لسه تعبنا
ومحتاج لراحة ...

عم صابر : أنا الحمد لله بقيت كويس.. يبقى القعاد في
البيت ملوش داعي.. واهو الواحد يتفك في الشغل
شوية...

عبد الغني : أيوه مقلناش حاجة.. بس أنت لسه
تعبنا... والتعبنا محتاج لراحة ...

عم صابر : يا حاج سبها علي الله ... أنت عارف إني
أنا برتاح هنا في الشغل... وبعدين أنا لو تعبنا
هقول أنا تعبنا ...

عبد الغني : براحتك يا عم صابر وحمد لله علي
السلامة يا سيدي..

عم صابر : الله يسلمك يا حاجإمال الشغل عامل ايه
اليومين دول؟

عبد الغني : أهو زي ما أنت شايف... الشغل من
غيرك يا عم صابر.. زيّ عدمه...

عم صابر : الله يكرم أصلك يا حاج ..إمال الست سندس
ما جتش مكانك ليه؟ .

عبد الغني : بتدلع يا سيدي عاملة تعبانة .

عم صابر : معلّش.. من الحق ما نزلتش بضاعة
جديدة ولا حاجة...

عبد الغني : ... (وهو يقلب في دفتر الحسابات) ...
لا يا عم صابر ... ما فيش حاجة جات في
بضاعة عندك يا عم صابر زيادة متقيدة بتواريخ
قديمة.. متعدلش فيها حاجة.. سبها زيّ ما هيه ...
عم صابر : ... بس أنا يا حاج ...

عبد الغني : ... (مقاطعًا) ... عارف يا عم صابر ...
إنك ملكش ذنب بس كل ما هنالك إني بلفت
نظرك ...

عم صابر : أنا نظري ملفوت من زمان يا حاج ...
عبد الغني : يبقى خلاص وأنا مش عايز اكتر من كده
...

عم صابر : ... اللي تشوفه يا حاج ...
عبد الغني : ... (وهو مازال يتفحص الدفتر) ...
آخر مرة كنت فيها معاك هنا ... كنت حاسس
أنك عايز تقول حاجة..

عم صابر : خلاص بقى يا حاج ... لا حاجة ولا
محتاجة ... العشرة الطويلة... اللي بينّا خلّتنا

نفهم بعض من نظرة.. و نحس باللي جوانا من غير ما نقوله لبعضنا..

عبد الغني : ... (يقفل الدفتر ويتحرك نحو الجمهور)
... كلامك صحيح يا عم صابر ...

عم صابر : طالما كلامي صح ... يبقى ملوش داعي ... الكلام ...

عبد الغني : ... وأخرتها ... ؟

عم صابر : ... خير إن شاء الله...؟! ...

عبد الغني : تعرف يا عم صابر ... الواحد مَنَّا أحيانًا يستعمل عواطفه أكثر من عقله.. وفي اللحظة اللي بيستعمل فيها عقله بيحس بالذنب تجاه نفسه وتجاه الآخرين..

عم صابر : والشاطر هنا اللي يوزنها بعقله ويستفيد من غلطة وميكروش بعد كده أبدًا ... وهو أنا اللي هوَّعيك برضو يا حاج ... (ثم يقترب من الجمهور) ... ربنا يفك أسرك وينصرك علي نفسك ...

عبد الغني : يا الله هنقول إيه ... كل شيء بأوان .

**** (في هذه اللحظة يدخل عصام) ****

عصام : ... سلام عليكم ...
عم صابر وعبد الغني : ... (معًا) ... وعليلكم السلام.
عصام : ... إزيك يا عم صابر ...
عم صابر : ... إزيك يا ابني ...
عصام : أنا عصام ... اللي كنت ساكن جنبك هنا وأنا
في الجامعة ... فاكرا يا عم صابر ...
عم صابر : ... (وكانه يتذكر) ... أيوه ... أيوه
إزيك يا عصام ... عامل إيه .. اتفضل اقعد...
عصام : الحمد لله يا عم صابر.. إزيك أنت عامل
إيه؟..
عم صابر : الحمد لله يا ابني أنت مش عارف الحاج
عبد الغني ولا إيه..
عصام : مش واخذ بالي يا عم صابر..
عم صابر : دا الحاج عبد الغني سعيد ... صاحب
الدكان .
عصام : ... معقول ...
عبد الغني : إزيك يا عصام ...
عصام : إزيك يا حاج ...

عبد الغني : مالك كده استغربت لَمَّا سمعت اسمي.

عصام : ما استغربتش وَلَا حاجة... صحيح رب صدفة خير من ألف ميعاد أنا كنت جاي هنا عشان أدور علي شغل فوالدي اداني جواب أوصله للحاج عبد الغني سعيد ...

عبد الغني : انت اسمك أيه بالضبط يا عصام ...

عصام : اسمي ... عصام عبد الحميد زينهم الحسانين...

عبد الغني : يا أهلاً وسهلاً ... أنت أبوك صديق عزيز أخ واكثر من أخ فين الجواب يا عصام ...

عصام : ... اتفضل يا حاج ...

**** (ثم يجلس عبد الغني ليقراً الجواب) ****

عم صابر : أيوه صحيح يا عصام ... رُب صدفة خير من ألف ميعاد ... أمال فين أصحابك اللي كانوا ساكنين هنا معاك ...؟

عصام : أهم موجودين الحياة لطشت معاهم ومعاي.. أنت عارف يا عم صابر إن الحياة بقت صعبة وفرص العمل قليلة...

عم صابر : خير إن شاء الله يا ابني ... كل شيء نصيب .

عصام : ... صحيح يا عم صابر ...

عبد الغني : ... (يفرغ من قراءة الجواب) ... أهلاً بك يا عصام وحمد الله على السلامة ...

عصام : ... ربنا يخليك يا حاج ...

عبد الغني : تاهت وليقناها يا عم صابر أنت عايز تشتغل في إيه يا عصام ..؟

عصام : ... أي حاجة يا حاج ...

عبد الغني : ... أنت معاك شهادة إيه يا عصام؟...

عصام : أيوه ... أنا معايا بكالوريوس تجارة ...

عبد الغني : كويس جداً ... إيه رأيك ... تشتغل معانا ... بشكل مؤقت لغاية ما تلاقي الفرصة اللي أنت بتحلم بيها ... وأهو تريخ عمك صابر شوية... والمثل بيقول اللي تعرفه أحسن من اللي متعرفوش ولا إيه يا عم صابر ..؟!

عم صابر : والله أنا كنت عايز أقول كده ... بس متنفعش تيجي مني أنا.

عبد الغني : وأديني قولتها ... إيه رأيك يا عصام ...

عصام : كده يبقى كتر خيركم ... وأنا جاهز ومن
دلوقتي ...

عبد الغني : ... خلاص ... علي بركة الله ...

عم صابر : ... آمال فين شنطتك؟ ...

عصام : شنطتي في السكن اللي كنت مأجره وأنا طالب

عبد الغني : لا ... مينفعكش يا ابني ... تروح تجيب
شنطتك دلوقتي ... وأنت يا عم صابر دبّر له نومة
الليلا دي عقبال ما أجهّزله الأوضة اللي جنب
المخزن بدل ما يدفع إيجار

عم صابر : ... والله كتر خيرك يا حاج ...

عبد الغني : هه ... يا الله أسييكم أنا دلوقتي ... عشان
تدبّروا أموركم ولو احتجت أي حاجة يا عصام كلم
عم صابر ومتتخرجش دا أنت ابن الصديق العزيز
والأخ الغالي.. يا الله سلام عليك ...

عصام وعم صابر : ... (في نبيرة واحدة) ... وعليكم
السلام ...

عم صابر : يا الله يا بطل روح هات شنطك وتعالى
عشان تأكل لقمة .. وتريح الليلة دي من السفر...

عصام : ... بس..

عم صابر : ... (مقاطعًا) ... ما ببش اسمع الكلام يا عصام ...

عصام : ماشي يا عم صابر.. سلام عليكم ...

**** (ثم يخرج عصام من المسرح) ****

عم صابر : وعلیکم السلام... (ثم يتقدم نحو الجمهور)
 ... ربنا يجعله سند لنا مش علينا ويبعد عنه
 إبليس وأعدائه سندس وورداني وبقية العصابة
 ... اللهم آمين ... آاااامین یااااااااااااارب (بصوت مرتفع) ...

*** (ثم يُغلق الستار) ***



الفصل الثالث

المشهد الأول

* المكان : بقالة عبد الغني سعيد.

* الزمن : الثامنة صباحًا.

**** (يدخل إلى المسرح عم صابر وعصام.. يفتح
الدكان ويجلس أمامه ويجواره عصام)****

عم صابر : أظن أنا امبارح شرحت لك كل حاجة
ورسيتك على كل كبيرة وصغيرة في الشغلانة
عشان ما يبقى لكش حجة..

عصام : أيوه ... بس أنت قلقتني من الست سندس مرات الحاج ... وأخوها الدجال ...

عم صابر : طول ما أنا معاك .. متقلقش .. وبعدين أنا بقولك على اللي بيحصل منها ... مش عشان أخوفك ... لا يا ابني أنا بس بوعيك عشان تبقى حذر..

عصام : ... ربنا يستر ...

عم صابر : إن شاء الله هيستر بس كل اللي أنا عايزه منك تفتح عينك لألعبها.. وتصمد كده وربك يجيب فرجه..

عصام : ... (يتقدم نحو الجمهور) ... من ناحية الصبر متقلقش دا أنا دافع فيه ثلاثين جنيه... يبقى إزاي مصبرش؟! ...

عم صابر : ... بتقول حاجة يا عصام ...

عصام : لا ... ما فيش حاجة يا عم صابر ...

عم صابر : أيوه ... يا عصام يا ابني ... وكمان عايزك تحب الراجل اللي مشغلك وتصون ماله وتحفظه.. دي أمانة يا ابني عشان ربنا يباركلك..

عصام : ... (ناظرًا للجمهور) ... هي ايه الحكاية
..... التلات نصايح اللي اشتريتهم عم صابر
بيأكدهم عليّ تأني يا ترى ايه العلاقة ولا مجرد
صدفه ... عمّا ... أنا كده كده لازم أعمل بيهم
لأنّي دافع فيهم من لحمي الحي ...

عم صابر : أيه يا عصام ... أنت مش معايا ولا إيه
؟...

عصام : معاك يا عم صابر معاك بس كنت بحفز نفسي
عشان أكسب التحدي .

عم صابر : ... تحدي إيه يا عصام ...؟

عصام : أصلي قبل ما آجي هنا.. فشلت في الحصول
علي فرصة عمل في بلدنا أنا وحمدي ونبيل .

عم صابر : ... (مقاطعًا) ... دول زمايلك اللي كانوا
ساكنين هنا أيام الجامعة..

عصام : ... بالضبط ...

عم صابر : ... وبعدين ... ؟

عصام : وبعدين أبويا ... اتهمني بالفشل .. أنا وزمايلي
و جيلي كله ... حاولت أقنعه بأننا مظلومين
والظروف هي اللي ضدنا ... أصر علي
موقفه... ودخلنا في دور تحدي ...

عم صابر : التحدي في الأول والآخر في مصلحتك أنت .

عصام : وأبويا برضو كان قصده كده ... مصلحتي أنا مش أي حاجة تانية وأنا كمان مش حريص على أني أكسب التحدي اللي بيني وبين أبويا قد ما أنا حريص على أني أكسب التحدي اللي بيني وبين نفسي ...

عم صابر : ... رائع يا عصام رaaaaائع ... أنت كده بتفكر صح ...

**** (في هذه الأثناء يدخل خميس) ****

خميس : سلام عليكم ... يا عم صابر ...

عم صابر : وعليكم السلام ... بسم الله الرحمن الرحيم خير اللهم اجعله خير .

خميس : مالك كده يا عم صابر ... ساعة ما شففتي وكأنك شفت عفريت ...؟

**** (في هذه الأثناء خميس يتأمل عصام ... وعصام يتأمله) ****

عم صابر : و مين سمعك ... دا أنت عفريت واللي مشغلك شيخ العفارييت .

خميس : أنت مالك كده حاطت نقرك من نقري يا عم صابر ...

عم صابر : لا نقري ولا نقرك ... قصّر وهات م الآخر ...

خميس : سيدنا الشيخ بعثني أسأل عن الست سندس ...

عم صابر : بلغ سيدك الشيخ ... إن الست سندس لسه ما جيتش مع السلامة بقى ... أحسن سيدك العفريت يستعوفك ... قصدي المبروك ...

خميس : أهو أنت تملي كده يا عم صابر تغلط فينا من غير سبب ... (ثم يقترب من عصام) ... أنا بيتهيا لي لامؤاخدة إني شفت الأفندي اللي معاك ده قبل كده ...

عم صابر : هتكون شفته فين يعني ... أنت يا واد هتسوق الهبل علي الشيطنة امشي يا واد لا أعلقك علي باب الدكان من رجليك ...

عم صابر : ... (يعود مرة أخرى) ... هرب مني ابن
الجنّة !....

عصام : ... وليه بس تتعب نفسك معاه يا عم صابر.؟

عم صابر : أصلي اتغظت من كلامه .. وأنت أيه اللي
حدفك على الشياطين دول عشان يقلّبوك بالشكل
ده ...

عصام : وأنا واقف في محطة الأتوبيس .. لقيت لمّة..
وقفت أتفرج عجبني الموضوع ودخلت فيه من
باب العلم بالشيء ...

عم صابر : يا الله زي ما بيقولوا ... حلاوة الخايب
سلامته ...

عصام : ... (مقاطعًا) ... كده يا عم صابر !!...

عم صابر : المهم تكون اتعلمت ... وجايز يكون خير
... أنا هسيبك دلوقتي وهجيلك بالليل عشان أستلم
منك .. أظن انت فاهم كل حاجة..

عصام : متقلّش يا عم صابر...

عم صابر : خلي بالك من ولاد الجنّة دول هينطّلك
كل شوية ... دول عفاريت خلي بالك منهم وفتّح
عينك قوي ... أنا مش هوصّيك

عصام : ... متقلّش يا عم صابر سيبها على الله ...

عم صابر : يا الله سلام عليكم ... (ثم يخرج من المسرح) ...

عصام : وعليكم السلام يا عم صابر ... (ثم يقترب من الجمهور ويقول) ... شوف الدنيا الشيخ ورداني طلع أخو مرات الحاج اللي بشتغل عنده كده الأمور بدأت توضح ...

عصام : دا إيه المفاجآت السارة دي.. ربنا يستر!...

**** (في هذه الأثناء تدخل الست سندس) ****

سندس : ... صباح الخير ...

عصام : صباح الخير بالليل يا أفندم ... قصدي صباح الخير صباح الفل يا أرض أحفظي ما عليكي..

سندس : إيه دا كله؟!.. إيه دا كله؟!.. كفاية صباح واحد انت العامل الجديد...؟

عصام : أيوه ... آه أنا الموظف الجديد ... (في حالة سخرية) ...

سندس : موظف ... هو إحنا هنا في شركة معا لينا
فين عمك صابر ...

عصام : ... هيستلم مني وردية آخر النهار يا افندم ...

سندس : ايه حكاية أفندم دي ... هو احنا هنا في
الميري اسمك ايه؟ ...

عصام : ... (يخطب على رأسه وكأنه تذكر) ... يااااه
اسمي عصام يا ...

سندس : ... (مقاطعاً) ... أنت باين عليك فاصل ...
الست سندس يا خويا .

عصام : ... أسف يا ست سندس ...

سندس : لا أسف ولا حاجة يا خويا صابر عرفك
الشغل عندنا ماشي إزاي ..؟

عصام : حصل يا افندم ... قصدي يا ست سندس ...

سندس : قال لك كمان إن أنا اللي مسئولة عن
الشغل...؟

عصام : ... أيوه ...

سندس : تمام عايزاك ... تخلي بالك يا عصام ...
وتراجع حساباتك أول بأول ... وأنت عارف إن
عم صابر كبر وماعدش بياخذ باله من الشغل؛

صحته بقت على قده ... و لولا أنه يشتغل مع
الحاج من زمان كنا طلعناه ...

عصام : ... (مقاطعاً) ... متقلّيش يا ست سندس
كل شيء هيمشي زيّ ما أنتِ عايزه ...

سندس : أنت باين عليك واثق من نفسك وأنا أحب
الشباب اللي بالشكل ده ... و كمان دمك خفيف
!...

عصام : متشكر يا افندم ... قصدي يا ست سندس ...

سندس : ... في حد سأل عليّ؟

عصام : آه في واحد سأل اسمه اسمه ايه ايه ... (في
حالة تذكّر) ... آه اسمه خميس ... من طرف
الشيخ ورداني ...

سندس : كويس ... خلاص أنا همشي دلوقتي
وهبقى أعدّي عليك تاني ... باين عليك شاب
لطيف آه بالحق إذا جالك أيّ حد من طرفي
ياخد بضاعة متدلّوش إلا إذا كان معاه ورقة
وعلیها إمضتي ...

عصام : ... (بغیظ) ... ربنا یسهّل ...

سندس : یلّه سلام ...

**** (ثم تخرج سندس من المسرح) ****

عصام : سلام ... باي .. (تُخفف الأضواء ويتجه نحو الجمهور) ... باين لي هكون السكين اللي هتطعن بيها جوزها المسكين وعم صابر الراجل الطيب

...

صوت هاتف لعصام : متقلقش أنت ماشي صح بس أوعك تضعف ...

عصام : لا من الناحية دي ... بإذن الله مش هضعف بس ممكن تورطني ... و تمسكني من أيدي اللي بتوجعني ...!

صوت هاتف لعصام : مش هتقدر لأنها خيفة منك أكثر من خوفك أنت منها ...

عصام : ... (يفيق لنفسه وينتبه) ... أنت مين مين أنت دا باين لها روح جدي عشان جات لي قبل كده في البيت .

***** (ثم يخرج عصام من المسرح مهرولاً ... ويُغلق الستار) *****

المشهد الثاني

* المكان : مخزن عبد الغني سعيد .

* الزمان : الساعة تقترب من الخامسة مساءً .

**** (يدخل الحاج عبد الغني إلى المسرح) ****

عبد الغني : ياه المخزن بقى عامل زي البيت
المهجور يا تري إيه اللي بيحصل من ورا
زهري مسير الحقيقة تبان وتبقى واضحة زي
الشمس وساعتها الخاين يأخذ جزاءه ... (ثم
يسمع دبيب أقدام تقترب منه) ... الظاهر إن في
حد جاي لناحية المخزن أنا أحسن حاجه
أخفقى دلوقتي ... (ثم يختبأ وتظهر علي
المسرح سندس وخلفها ورداني ...) ...

سندس : حد شافك وانت جاي ورايا ...

الشيخ ورداني : هو احنا بنسرق ... وبعدين الناس
هنا كلها عارفين إن إحنا أخوات بيقى مافيش
داعي للقلق في وجودي معاكي ...

سندس : مش كده يا أبو العريف ... أنت عارف إن
المدعوق صابر راصدني في الراححة والجاية
وشغال عصفور للحاج ...

الشيخ ورداني : متشغليش بالك بالمدعوق صابر ده
خالص النوبة دي عملت له حطة حجاب ...
ميخرش المية ...

سندس : أيوه يا خويا ... بأمارة ما قام من عياه
زيّ الجمل ووقف لنا زيّ الشوكة في الزور ...

الشيخ ورداني : لا متقلقيش ... دا أنا النوبة دي مأمّن
الحجاب معمول على ديل حمار صعران ... كل
ما الحمار يهز ديله ... كل ما صابر يكح ويعطس
... و لما يزيد عليه الحال نقول عليها عدوه ...
وبالشكل ده بيبقي وجوده في الدكان خطر علي
البضاعة وعلي الزباين وفي الحالة دي مش هيبقى
قدام الحاج إلا إنه يفصله من الشغل ... وبكده
يبقي قطعنا نص المشوار ... والباقي دورك أنتي
يا ست الكل...

سندس : ... محاول أصدقك النوبة دي يا ورداني ...

الشيخ ورداني : ... (مقاطعًا) ... لا صدّقي ...
واعزمي وتوكلّي كله بأمر الله ... يا حيّ.. (يقول
هذه الكلمات وهو في حالة الدروشة) ...

سندس : ... ناولني الحجاب ...

الشيخ ورداني : اتفضلّي يا ست الكل ... بس خليه
تملي قريب من قعدته في الدكان ...

سندس : طيب والمدعوق الجديد اللي اسمه عصام ...
أنا خيفة لصابر ياخذه تحت باطه ويبقى بدل ما
نحارب في جبهة نحارب في اتنين ...

الشيخ ورداني : وده كمان متقلقيش منه ... بيانه
وصلني اسمه عصام عبد الحميد جه هنا بعد ما
فشل في الحصول على فرصة عمل في بلدهم .

سندس : ... طيب وصل للحاج ازاي ...

الشيخ ورداني : عن سابق معرفة قديمة ... بين والده
... والحاج عبد الغني .

سندس : الكلام يخوف ... والحل إيه يا ورداني؟ ...

الشيخ ورداني : متقلقيش هنضمّه لصفنا ... ونلاعب
بيه صابر ...

سندس : ... أنا خيفة ...

الشيخ ورداني : متبقيش سندس بنت أبويا وأمي..
جمّدي قلبك إحنا داخلين علي منعطف خطير
وبعدين متقلقيش من عصام ... عصام كل اللي
في دماغه إنه يشتغل ويثبت لوالده انه مش
فاشل ... وإنه قدّ المسؤولية ... بس لازم نلحقه
قبل ما صابر يزّن في ودانه وانتي عارفة إن
الزّن على الودان أمرّ من السحر....

**** (الحاج يظهر من وراء الجدار ويقول بصوت
منخفض)****

عبد الغني : يا ولاد ستين في سبعين ليلتكم طين بإذن
الله ...

سندس : ... (تستأنف حديثها مع ورداني) ... في
دماغك خطة ...؟

الشيخ ورداني : طبعا ... وجاهزة كمان ...

سندس : ... إيه هي؟

الشيخ ورداني : شوفي بقى يا ست الستات ... إحنا
نحاول نبعثله حد في ورديته ... يشيل منه
بضاعة على اسمك ... بس تعرّفه ... إنه
مايقدهاش وبعد كده تقيديها أنتي بنفس التاريخ في

وردية عم صابر ... وتعملي جرد مفاجأة قبل
الميعاد بكام يوم ... وتحلو أكثر لو الحاج يكون
موجود ... تبقى بكده ضربتين بحجر واحد ... إيه
رأيك؟

سندس : يا ابن العفاريت ... أنت ايه ...؟

الشيخ ورداني : ... (مقاطعاً) ... أنا الورداني اللي
خايف على مصلحة أختي من التعابين ... اللي
حواليها ...

سندس : مصلحتي أنا ... وبس .

الشيخ ورداني : وبرضو ... مضرش لو إنه يبقى لي
بعض النفحات....

سندس : مش خسارة فيك أي حاجة ...بس المهم
أخلص من صابر ... وعامة أنا إديت خبر لعصام
إن أي حد يجيله من طرفي يطلب بضاعة ما
يدلوش إلا بورقة عليها إمضتي

الشيخ ورداني : ... (مقاطعاً) ... حلو ... أنت كده
قصرتي علينا الطريق ... وبكده نبتدي نبعثلك
الواد خميس من بكرة .

سندس : أنت ناسي انه شاف خميس امبارح لما جه
يسأل عليّ ...؟

الشيخ ورداني : أه صحيح ... خلاص نبعتله ياسين ...
(حالة تذكر) ... لا حتى ياسين ربما يكون شافه
برضو قبل كده في النصبة

سندس : ... (مقاطعاً) ... يبقى مفيش غيرك ... ولا
شافك أنت كمان ...

الشيخ ورداني : لا مشفينش ... لكن سمعني ...
سندس : خلاص يبقى أنت اللي تقوم بالدور ده

الشيخ ورداني : ... على البركة
سندس : متقلقش مش هيفتكر صوتك ... وبعدين
يا الله بقى ... قبل ما حد يطب علينا ... يبور كل
اللي إحنا بنعمله

الشيخ ورداني : عندك حق ... يا الله بينا ...

** (ثم يخرجان سوياً من المسرح ويظهر عبد الغني
على المسرح) **

عبد الغني : يا ولاد الجنّة ... دا انتوا طلعتوا أجرم من
الشياطين بشوية بس هتروحوا مني فين ...
وراكم لحد ما أخرب بيتكم واحد.. واحد .

*** (ثم يخرج من المسرح ... وتُخَفَّف الأضواء
ويُغلق الستار) ***

المشهد الثالث

* المكان : بقالة عبد الغني سعيد .

* الزمان : الخامسة مساءً .

** (يُفتح الستار على عصام وهو جالس أمام
المحلّ يتصفح دفتر الحسابات)**

عصام : يااااه ... ياه ... !

** (في هذه الأثناء يدخل عليه زبون)**

الزبون : السلام عليكم ...

عصام : ياه ... قصدي وعليكم السلام ... خير .

الزبون : عايز بجنيه زعفران أحمر ...

عصام : ليه هتحضروا لحاجة

الزبون : لا ... وحياتك هصرف ...

عصام : ياه معاك بون ... (بسخرية) ...

الزبون : بون إيه وبتاع إيه يا أستاذ ... آمال فين عم صابر ...؟

عصام : عمك صابر جاي كمان ساعة ... آمال هتصرف إيه ...

الزبون : ... العفريت ...

عصام : و بتقولها كده في وشي ... و مش خايف ...

الزبون : ... وهخاف من إيه ...؟

عصام : ممكن تصرف غلط ولا حاجه .

الزبون : متقلقش حتى لو صرف غلط ورانا الشيخ ورداني .

عصام : ياه ... عايز نصيحتي اصرف غلط ومتجيش الورداني ...

الزبون : ليه بتقول كده يا أستاذ دا شيخ مبروك ... السماح يا مولانا السماح .. السماح ...

عصام : ... مبروك الله يرحمه ... البركة في ابنه توفيق ... اتفضل طلباتك .

**** (ثم يأخذ الفلوس ويعطي الزبون الطلب) ****

الزبون : ... (وهو خارج) ... سلام .

**عصام : سلام الله معاك روح يا شيخ على الله يركبك
العفريت أنت والورداني بتاعكم ده ...**

**** (ثم يدخل عليه نبيل وحمدى) ****

**حمدى : ... (متلهفًا) ... أنت يا واد يا بتاع المحل
أنت يا عطار ...**

**عصام : مين حمدى ... ونبيل مش معقول ... (ثم
يحضن بعضهم البعض) .. وإيه المفاجأة الحلوة
دي ... وعرفتوا مكاني إزاي ... ؟**

نبيل : اللي يسأل ميتهش

**حمدى : أنت ناسي إن إحنا متفقين إن همزة الوصل ما
بيننا عم صابر ...**

**عصام : أيوه صح ... اتفضلوا ... اتفضلوا ... تشربوا
إيه .. ؟**

نبيل : لازم نضايف يعني ... خليها على قديمة ...

عصام : ولد يا سمعة ثلاثة شاي مذبوط..(يضحكون)

حمدي : اقفل على الطلبات دلوقتي يا سمعة....

نبيل : هو أنت كده علطول ماسك القفل ... ما بتفتحش أبدا

عصام : والله العظيم وحشتوني حتى القهوة وسمعة وهو جاي بالطلبات وبيقول عُلم وجاري التنفيذ ... وأبويا وأمي وحشوني قوي.

حمدي : يا ابني دا أنت لسه مبالكش كام يوم ... ركز شوية يا صاحبي واصبر .

عصام : من ناحية الصبر متقلقش أنا ماضي معاه "كنتراتو"

حمدي : ... أيه أخبارك يا عصام ...

عصام : الحمد لله ... كله تمام ... صحيح الأمور ملخبطة شوية لكن اديني صابر لحد الأمور ما تستقر وربنا يسهل ... و علي فكرة أنا كنت مستني بس لحد ما أستقر وأشوف لكم فرصة شغل حواليه .

نبيل : متقلّش يا صاحبي ... إحنا جايين هنا على شغل
وهنمضي جواب التعين النهارده ...

عصام : صحيح ألف مبروك ويا ترى وظيفة في
الحكومة ولا

حمدي : ... (مقاطعاً) ... لا يا أبو السباع مصنع
قطاع خاص في مدينة العاشر عبال ما تفرج
....

عصام : نعمة إن شاء الله هتفرج عن قريب ...

حمدي : طيب طالما اطمّنت عليك نستأذن بقي

عصام : لسه بدري هو إحنا لحقنا نقعد مع بعض

نبيل : يا اخويا بكره تزهدق مننا ... بس أنت اتجدعن
كده وجهّز مشاربيك

وسندوتشاتك ... (يضحك) ...

حمدي : احنا هنمشي دلوقت علشان نلحق نرتّب
أمرنا في الشغل ولما نستقر هنجيلك تاني وتالت
لحد ما نزهدق من بعض يا الله سلام .

عصام : مع السلامة (ثم يخرج من المسرح ويتقدم
عصام نحو الجمهور) أهّي دي بقي أحلا لقطه
في اليوم كله ...

**** (ثم يدخل الورداني المسرح متباطئاً من خلف عصام ... تُخفف الأضواء في هذه اللحظة) ****

الشيخ ورداني : ... السلام عليكم ...

عصام : ... (ملتفتاً) ... باسم الله أهـي دي بقى أفـضع لـقطة في الـيوم كلـه.

انت مين؟ ...

الشيخ ورداني : ... (يعطي عصام ورقة) ...

عصام : أنت تبع الست سندس؟

الشيخ ورداني : ... أيوه

عصام : بس البضاعة اللي كاتبة عليها كتير قوي ...

الشيخ ورداني : ... (صامتاً) ...

**** (عصام يعود لقراءة الورقة مرة ثانية وفي هذه الأثناء يدخل ياسين مهرولاً) ****

ياسين : ... (بصوتٍ قويٍّ) ... سلام عليكم ...

عصام : (مقاطعاً) ... أنت تاني عايز إيه ..؟

ياسين : عايز مولانا الشيخ ورداني

الشيخ ورداني : ... (بصوت خافت) ... اسكت ...
... اسكت ...

ياسين : الخال خميس مستعوقك وبيقولك الزباين
ترش عليها الملح مينزلش..

الشيخ ورداني : غور دلوقتي ... وقوله جاي ورايا ...
امشي . امشي يا غبي .

** (ثم يخرج ياسين من المسرح بعد إن انتهره
الشيخ ورداني ولكزه بكتفه) **

الشيخ ورداني : ... (بصوت خافت) ... الله يخرب
بيتك أنت والخال خميس في ساعة واحدة ...
بوظت كل حاجة

عصام : ياه . ياه ... يا محاسن الصدف ... أهى دي
أجدد لقطة في اليوم كله.. أنت بقى الشيخ ورداني
؟...

الشيخ ورداني : ... أيوه

عصام : فاكّر لما قلت لك عايز أشوف اللي بيكلمني
وأنت قلت لي كل شيء بأوان ...

الشيخ ورداني : وأديني جيت في ميعادي لما النصيب
حكم ...

عصام : تفتكر أنك جيت فعلاً في ميعادك ولا الصدفة
هي اللي جبتهك ...

الشيخ ورداني : مش هتفرق ... المهم أنك تكون
اقتنعت زيّ ما اتفقنا وأمنت بأننا اللي بنختار
مصيرنا في الحياة

عصام : أنا فعلاً اقتنعت بكلامك .. بس لسه مقتنعش
بالإنسان اللي جواك ... معدش فاهم حاجة في أي
حاجة ... محتاج أجوبة لألف سؤال وسؤال
بيدوروا في دماغي محتاج تفسير لكل علامة
استفهام بتختم جملة اعتراضية منا فيه .. لكل
اللي اتعلمناه ... محتاج ترجمة حقيقية للواقع
اللي إحنا بنعيشه ...

الشيخ ورداني : أنت مش محتاج كل ده ... قد ما أنت
محتاج تتعامل بحكمة أكثر من مصدقيه ...
ومحتاج ... تتفاعل مع كل العقول والثقافات
والعادات اللي ممكن تقابلك في حياتك ... و تلزمك
إنك تتعامل معاها ... بدون اختيار سابق ...

عصام : تفتكر إن هو ده المنطق ...

الشيخ ورداني : طبعاً

عصام : عشان كده أضطريت تشتغل دجال ...

الشيخ ورداني : بالعكس أنا كان نفسي أكون غير كده ... في يوم من الأيام كنت زيك شاب ... عندي طموح وأمل في إن بكره يكون لي .. لكن مريت بظروف قاسية حسيت في لحظة إن دي نهاية العالم ... لكن حاولت مره ثانية أتحدى بالصبر ... واقف على رجلي وقلت أشتغل وأعظ وأنور عقول الناس بالعلم اللي أنا اتعلمته ... وأصح مفاهيمهم ومبادئهم الموروثة خطأ ... وفعلاً بادية بالمكان اللي أنا فيه... وفي أول مقابلة بيني وبينهم قالولي عصر الفلاسفة انتهى من زمان يا فليسوف واتهموني بالجهل ... وقتها حسيت إن أنا وصلت لهم من طريق غلط ...

عصام : وإيه هو الطريق الصح ؟...

الشيخ ورداني : أني أوصل معاهم في الجهل لحد ما أوصلهم للصح بالتدريج..

**** (في هذه الأثناء يدخل الحاج عبد الغني وخلفه عم صابر) ****

عبد الغني : ... (يدخل وهو يصفق بيديه) ... برافو ...
 ... برافو كلام جميل ... يلين دماغ شاب طيب
 طري لسه على نيته ... زي عصام وأهو ...
 بدل ما يبقى ضدكم يبقى معاكم على الأقل قبل ما
 عم صابر يلطفه منكم ويزود أعدائكم واحد ...
 وعشان تكمل الخطة ... سندس تبعت الورداني
 ... قصدي مولانا الشيخ ورداني لعصام ياخذ
 منه البضاعة و بعد يوم ولا اتنين تتقيد في وردية
 عم صابر وبكدة تضربوا عم صابر في عصام
 وبعد كده مش هيفضل قدامكم غير الحاج عبد
 الغني اللي هو أنا وزى ما خلصتوا من اللي قبله
 تخلصوا منه ... مش هي دي الخطة ...

**** (في هذه الأثناء تدخل سندس) ****

سندس : خير يا حاج أنت بعت لي ليه ؟
عبد الغني : عشان نتحاسب و الخاين ياخذ جزاءه ...

**** (سندس ترتجف وتحاول أن تتماسك) ****

الشيخ ورداني : خطة إيه ... و جزاء إيه اللي أنت
بتحكي عليه ده أنا مش فاهم حاجه ...

عبد الغني : فكريه يا سندس ... بأمانة الخطة اللي
رسمتها مع بعض عند المخزن ...

سندس : مين اللي قالك الكلام الفاضي ده

عبد الغني : محدش قال لي أنا اللي شفت وسمعت
بالصوت والصورة ...

سندس : ... (تنهار) ... كفاية بقى ... كفاية ...

عبد الغني : اخرسي يا خاينة...

**** (في هذه الأثناء يدخل ضابط الشرطة وخلفه اثنان
من الشرطة) ****

الضابط : مين فيكم الشيخ ورداني

الشيخ ورداني : أنا خير

الضابط : أنت صاحب النصبه اللي في المحطة

الشيخ ورداني : آه آه أيوه ليه

الضابط : ... (مقاطعا) ... ممكن تتفضل معنا
الشيخ ورداني : بس أنا كنت عايز أعرف انتوا
واخذني علي فين وأنت مين ...
الضابط : أنا الرائد أحمد عبد العظيم .. مباحث ...
الشيخ ورداني : طب ممكن أفهم واخذني ليه
الضابط : هناك في القسم هتفهموا كل حاجة ...
اتفضل ...

**** (يأخذه رجال الشرطة إلى خارج المسرح) ****

عبد الغني : يا خسارة فات من أيدي الجبان ... بس
هيروح فين مسـيره هيجيني ثاني وساعتها
هصفي معاه الحساب كله القديم والجديد ... أما
أنتي حسابك دلوقت ... (مشيراً إلى سندس)
...

سندس : هتحاسبني على إيه يا حاج هدت حيلي في
شغل الدكان والمخزن عشان أحافظ لك علي
مالك من الديابه اللي حواليك ... ولا هتحاسبني
على صبري معاك وأنت من سن أبويا ... ولا

على حرمانى من طفل صغير يقولى يا ماما زى
بقية الخلق ... غلطة واحدة مسكتها على عايز
تعلقى بيها المشنقة وأنا متحملة كل المرات ده
وقفله بقى ...

**** (عصام يصطحب عم صابر فى جانب من
المسرح) ****

عصام : مرافعة قوية يا بنت الآلة ... صحيح إن
كيدهنّ عظيم ...

عم صابر : على الله الحاج مينخّش ويرجع يحنّ تانى
يبقى كأنك يا أبو زيد ما غازية .

عصام : كل شيء دلوقتى هيبان الصبر مفتاح الفرج
...

عبد الغنى : خلصتى يا سندس ... قولتى كل اللي
جواكى خليكى فاكرة إنى أنا عمر ما جبرتك على
حاجة وكل اللي كنتى بتحلمى بيه كان بيحبلك
نشلتك أنتى وأخوكى من الغابة اللي أنتوا كنتوا
عايشين فيها وأخرتها تعضّ الإيد اللي اتمدت لك
و كمان تعابرينى يا خاينة ...

سندس : أنا خاينة .. يا شايب يا عايب يا أبو شنب
دايب ...

عصام : هي وصلت للشنب كمان ...

سندس : والنبي لا ألمّ عليك السبع بلاد وأخلى اللي ما
يشتري يتفرج كل اللي أنت عاملة ده عشان
الشحطين دول .. دا الواحد فيهم ميجيش فـي
سوق الرجالة برقع جنيه مخروم ...

عصام : أنتي بطولّي لسانك علينا احنا كمان ...

عم صابر : ... طول بالك ...

عصام : أنت مش سامعها بتقول علينا إيه

عم صابر : سامع ... شحطين يعني أنا وأنت ...

عصام : ... وفرحان يا عم صابر ...

عم صابر : امسحها فيا يا سيدي ... اصبر في عرضك
.. (بصوت خافت) ..

عصام : آه صحيح لازم نصبر ... (حالة تذكر) ...

عم صابر : ... (يراقب الحوار) ... أيوه ... أيوه ...
قولها بقي في عرضك ...

**** (في هذه الأثناء ينظر عصام لعـم صابر والحاج عبد الغني) ****

عبد الغني : معلش يا عم صابر .. حقك علي يا عصام
يا ابني ... الظاهر إن سندس حنّت للحارة اللي
كانت عايشة فيها وإن شاء الله هترجع ليها
النهارده ... سندس أنتي طالق ...
عم صابر : ... الله أكبر ... الله أكبر ...

**** (في هذه الأثناء يجري عصام نحو عبد الغني ويضع يده على فمه) ****

عصام : اقفل في عرضك .. كده طلقة واحدة كفاية في
فرصة إنك ترجعها تاني .

عبد الغني : طالق ...

عصام : اتنين برضو .. ملحوق عليهم ... وإن جات
على محلل ما فيش مشكلة كله في النهاية يتوقف
علي رأي الشيخ ...

عبد الغني : طالق ...

عصام : ... (يدفع يده عن فم عبد الغني) ... كده
تروحي بيتكم بالتلاتة ... وتحطي في بطنك بطيخة
صيفي وتكتبي عليها من بره بطيخة العنس المبكر
...

عم صابر : ههههه...

سندس : أنا يا أبو قردان ... دا أنت وعمك صابر
عملين زيّ توم وجيري ... والحاج بتاعكم عمل
زيّ إسماعيل ياسين..

عبد الغني : ... برّه ... برّه ...

سندس : بالراحة على نفسك يا خويا شوية ... لينطلق
عرق وأنت عامل زيّ اللي طالع من القبر بكفالة
... (وهي خارجة من المسرح تمسك بشعرها
وتقول) ... وحياة ده لأوريك وآخد منك الحق
والمستحق سلام .

عبد الغني : أنا عامل زيّ إسماعيل ياسين يا عم صابر
...

عصام : هو أنت هتصدّقها ... صلي على النبي كده يا
حاج ...

عصام : وهو إسماعيل ياسين وحش دا كان راجل ميه
ميه .. بس ميعيوش إلا بقّه وأنت والحمد لله بقك
كويس يا حاج ...

عم صابر : أهو قالك الراجل أهه ... والنبي لأجوزك
ست ستها ...

عبد الغني : وهو أنا يعني كنت متجوز فاتن حمامة ...
دي حتى كانت عاملّة زي عيشة الكيلاني ... الله
يرحمهم جميعًا هه يا الله سلاموا عليكم
...

عم صابر : ما تستنا شوية أما تروق يا حاج ... عبد
الغني ...

عبد الغني : سلام ...

عم صابر : وعليكم يا حاج ... كان الله في عونك ... يا
خوفي يا حاج لا بعد كل ده ترجع تحنّ من
جديد ...

عصام : يبقى طلقنا بالتلاتة احنا كمان ...

عم صابر : ليه هو إحنا ذنبنا في حاجة هو اللي وصل
نفسه للحقيقة ... لحد ما وقعها هي وأخوها رأس
الأفعى ... الدجال ده ...

عصام : بس أنا حاسس بالذنب يا عم صابر ... خايف لأكون السبب في خراب بيت الحاج ...

عم صابر : شوف يا ابني اللي حصل النهارده ... ده كان لازم يحصل عشان الظالم ينول جزاءه ...

عصام : و دي النهاية الحتميه لكل ظالم ... بس إللي أنا مستغرب له إن إزاي واحد زي الورداني ربنا انعم عليه بعلم وثقافة ولبـاقة وميستخدمهاش في مكانها الصح ... ويلبس قناع التدين .. و يتاجر بيهم على الناس ... عشان يجمع الفلوس وحجته إن الناس هي اللي جهله .

عم صابر : متستغربش من أي حاجة وصدق أيّ حاجة ... الزمن اللي إحنا فيه بقى يخوف عشان كده الواحد مننا لازم ياخذ الحذر من كل الناس في سلوكهم وتصرفاتهم ... ياخذ باله من كل اللي بيقراه واللي بيسمعه و اللي بيشفوه ... و ميصدقش بسهولة عشان ميقاش ضحية في يوم من الأيام ... لثقافة مجهولة ...

عصام : الله يا عم صابر ... كلامك حلو ... بس يخوّف ...

عم صابر : ميخوّفش إلا الساهي اللي بيعمل بسلامة نية

...

عصام : وآخرتها يا عم صابر ...؟

عم صابر : خير إن شاء الله يا ابني ... أنت تعبت

عصام : مش عارف ... بس محتاج أغير جو.....

عم صابر : روح شوف أهلك وغير جو

عصام : صحيح يا عم صابر ...

عم صابر : صحيح بس مش أكثر من يوم واحد

عصام : موافق ...

عم صابر : خلاص يله بينا

*** (ثم تُخفف الأضواء ... ويُغلق الستار) ***

المشهد الرابع

* المكان : بيت عصام .

* الزمان : الساعة تقترب من الحادية عشر صباحًا .

** (عبد الحميد والد عصام جالس يتصفح الجرنال ...
وفجأة يدق جرس الباب) **

عبد الحميد : يا ترى مين اللي جاي دلوقتي ... (ثم
ينهض ليفتح الباب) ... مين عصام إزيك يا ابني
عامل ايه يا حبيبي تعالى ... تعالى في
حضني .

عصام : أزيك أنت يا بابا ... وحشتني جدًّا وماما كمان
... وحشتني قوي ...

عبد الحميد : يا زينب . يا زينب عصام رجع يا
زينب ...

**** (تدخل زينب وفي يدها مغرفة المطبخ) ****

زينب : عصام ... إزيك يا ضنايا عامل ايه يا حبيبي..

عصام : واحدة واحدة يا ست الكل.. أنا الحمد لله كويس وزيّ الفل أنت اللي عاملة إيه ...

زينب : أنا كويسة يا ابني طول ما أنت بخير ...

عبد الحميد : آمال دي أجازة ولا إيه يا عصام ...؟

عصام : مفيش ولا ... يا أستاذ عبد الحميد دي مجرد أجازة لمدة يوم واحد ... وراجع تاني .

عبد الحميد : ... (وهو يضحك) ... يبقى كده كسبت التحدي .

عصام : وبلا فخر ... بالنيابة عن أبناء جيلي ... وحتى حمدي ونبيل ... يا بابا هما كمان اشتغلوا وكسبوا هما كمان التحدي ...

عبد الحميد : و أنا كمان سعيد بالكلام اللي بسمعه منك ده يا عصام وفرحان لك جدًّا أنت وأصحابك ...

**** (زينب تترقب عبد الحميد وعصام) ****

عصام : صحيح يا بابا ...

عبد الحميد : طبعًا يا عصام ...

زينب : تحدي إيه و بتاع إيه ... اللي أنتوا بتتكلموا فيه
دلوقتي ... ما تخلينا نفرح بالواد يا عبد الحميد

...

عبد الحميد : اتفضلي يا ستي افرحي بيه ... أديني
سكت أهه ...

زينب : ازيك يا عصام عامل إيه يا ضنايا ... يا ترى
كنت بتأكل كويس ... والشغل عامل إيه
معاك .. (تشم يمينًا ويسارًا) ...

عبد الحميد : دا الطبخ ... شوفيه ليكون اتحرق .

زينب : هشوف الطبخ وأرجعك تاني يا عصام .

**** (ثم تخرج من المسرح) ****

عبد الحميد : كويس إنها خرجة عشان نتكلم براحتنا
... عامل إيه يا عصام وأخبار الشغل معاك إيه؟

عصام : الحمد لله يا بابا كله تمام

عبد الحميد : ... (يشمّ بأنفه يمينًا ويسارًا) ...
تتحداني ثاني يا عصام ؟

عصام : ثاني يا بابا ...

عبد الحميد : النوبة دي ... النتيجة هتبان بسرعة ...
مش هتاخذ وقت .

عصام : إذا كان كده ما فيش مشكله ... إيه بقى نوع
التحدي؟

عبد الحميد : أمك طابخة إيه النهاردة ...؟

عصام : ... (عصام يشم الرائحة ويفكر بدقة) ...
أكيد ملوخية ...

عبد الحميد : ... (وهو بيضحك بصوت عالٍ) ...
تكسب المرة دي كمان ..

** (ثم يضحكان سويًا حتى يرتفع صوتهما) **

*** (ثم يُغلق الستار) ***

النهاية

obeyikan.com

عماد الرمادي

- حاصل على دبلوم معلمين أزهرى عام ١٩٩٨ م.
- حاصل على معهد الفنيين البحرين من الأكاديمية العربية للعلوم والتكنولوجيا سنة ٢٠٠٣ م.
- حاصل على ليسانس تربية قسم آداب وتربية من جامعة كفر الشيخ.
- الوظيفة : موظف بالأزهر الشريف.
- العضويات:-

- عضو نادى أدب البرّس.
- عضو نقابة فئاني أقاليم مصر.
- مؤلفات تحت الطبع بعنوان :-
- حارة الزعماء.
- معاناة الطيور.

للتواصل مع الكاتب: ٠١٢٢٩٠٧٨٠٨٦

الفهرس

٥	إهداء
٧	مقدمة
٩	الفصل الأول (المشهد الأول)
١٦	(المشهد الثاني)
٢٣	(المشهد الثالث)
٣٣	(المشهد الرابع)
٤١	(المشهد الخامس)
٤٩	الفصل الثاني (المشهد الأول)
٥٦	(المشهد الثاني)
٦١	(المشهد الثالث)
٨٨	(المشهد الرابع)
٩٧	الفصل الثالث (المشهد الأول)
١٠٨	(المشهد الثاني)
١١٤	(المشهد الثالث)
١٣٣	(المشهد الرابع)



الإسكندرية ج . م . ع

٠١٠١٨٨٣١٣٦١ (+٢)

٠٣/ ٥٧٦٥٧٧٧ (+٢)

حسنا للنشر والتوزيع

